

UNSA BA'Y INGON NINYO KUNG KINSA KINI?



Maayong buntag, mga higala. Ginaisip ko gayud kini nga usa ka prebilibiyo ang mahianhi niining iglesia. Ug medyo nagustohan ko ang ngalan niini sa sugod pa lang. Nga gitawag kini “Jesus Name.” Nagustohan ko kana. Ug akong—nagtoo ako nga kana’y—kana’y. . . Nga sa niana nga Ngalan ako natubos, kanang hiligugmaon nga Ngalan ni Ginoong Jesus. Ug dayon nga mahianhi dinhi kauban ang suod kong mga higala, nga nagkatigum dinhi niining maanindot nga buntag sa Dominggo, dinhi mismo sa Phoenix. Wala na ko’y nahibaloan pa nga unsa mang lugar nga mas gustohon kong mahiadto, gawas ang mamaatua sa Himaya nga kauban kamong tanan. Ug mao kana ang dakung panghitabo nga atong ginapaabot sa umalabot nga adlaw.

² Ug aduna’y pagpanawag kanako gikan sa masakiton, aron paanhion dinhi, karong adlaw. Ug naestorya ko si Igsoong Outlaw, ang bililhon kong higala, ug iya—maabiabihon niya akong gidapit sa—sa pag-anhi dinhi. Ug dugay na nga maayo kaayo kanako ang tanan nga mga ministro dinhi sa Phoenix.

³ Mahunahuna ko usahay kon nganong mibalhin ako didto sa Tucson. Tulo na ako ka tuig didto, ug wala man gyu’y nag-dapit kanako sa unsa mang pulpito. Busa siguro akong. . . buhaton ko na lang ang akong—akong mga pagbisita dinhi sa Tucson. . . o dinhi sa Phoenix, kon diin mabati ko nga ginaabiabi ako. Bueno, siguro maanad na sila kanako sa pipila ka. . . Kahibalo mo, miwali ako didto sa miaging gabii, ug tulo ka oras akong nagwali; mao siguro nga wala na nila ako gipabalik.

⁴ Apan aduna ako’y ingon niana gayud nga—nga pagbati sa akong kasingkasing alang sa Dios ug sa Iyang katawhan. Ug mahinay ako kaayo, ug ako—nahadlok ako nga aduna ko’y malaktawan ug nga dili pa mahisgotan og igo, ug mga tulo o upat ka mga mensahe ang gihisgotan ko diha sa usa ra ka higayon. Busa ako’y tinuod nga. . . kamong mga atua niadto didto, pasayloa ninyo ako sa paglangan kaninyo sa ingon niana ka dugay. Wala unta nako kadto buhata.

⁵ Ug malipayon usab ako niining buntaga nga mahianhi dinhi kauban ni Igsoong Carl Williams, ug ang batan-on dinhi nga si Jimmy, ug sa mga mag-aawit, ug ang higala kong magsoon nga Mosley; ang makita si Brad, si Igsoong John Sharrit, ug daghan pa sa akong mga higala; Si Igsoong Pat Tyler, dinhi, nga gikan pa didto sa Kentucky, ug—ug—ug daghan pa nga

mga kahigalaan aron manggitigum lang dinhi sa niining—niining panagtigum niining buntaga. Kita n'yo, nakita ko ang kadaghanan sa akong mga higala nga gikan pa sa Tucson ug uban pa, nga nanglingkod dinhi.

⁶ Ginahunahuna ko ang usa ka adlaw sa dihang matapos na kining tanan, dayon managkatigum kita kon diin kita'y . . . dili na kita . . . kita—dili na kita kinahanglan pa nga moundang sa pagpaminaw niining maayong mga kalantahon, nakita n'yo. Nahimatikdan ko lang kanang anak nga lalaki ni Igsoong William, nga nagalingkod diha sa likod, naghatag siya og usa ka testimonyo niadtong miaging gabii didto sa Ramada Inn. Ug siya siguro mga hapit na gayud og unom ka pye ang katas-on. Apan sultihan ko kamo, human niadtong maong testimonyo, nagtoo kong napulo ka pye na ang iyang katas-on. Iya gayud . . . Nalipay gayud ako sa giingon sa maong bata, pagkaanindot kaayo nga testimonyo.

⁷ Sa dihang madungog ko kining buutan nga mga batan-on nga nagapamatuod sa ilang nakasentro nga pagtoo diha kang Cristo . . . Ug ako—nagakatigulang na ako, ug ako . . . usa ka adlaw kinahanghan ko na nga—nga—nga moundang ug Mopauli na. Ug nga makita kining nagasingabot nga mga batan-on nga andam na, ug nga ginaandam na ang ilang mga kaugalingon aron sugdan kung asa ako miundang . . . Ug ingon niana ang ginabuhat nato. Ug ingon nianang paagi nga napahimutang ang kinabuhi. Nga kita . . . nga mohawa ang usa ka henerasyon . . . ug ang amahan ug inahan. Ug padakuon nila ang gagmay nilang mga anak, ug mamakita kining nangaminyo; ug nangahimugso na ang mga apo. Ug sa paglabay sa pipila ka panahon, si Papa ug si Mama mopauli na ngadto sa abog. Ug dayon, nianang panahona, ang maong mga anak na dayon ang andam na usab sa pagkaaduna og mga apo; ug dayon, sila na usab ang motaliwan. Apan magkaaduna og usa ka daku, pang-kinatibukan nga pagkabanhaw usa sa niining mga adlaw. Tanan kita ipatawag ngadto sa Presensiya sa Dios aron manubag sa atong mga gipangbuhat sa kung unsa'y gihatag sa Dios kanato: si Jesus Cristo. Ug busa, malipayon ako kaayo nga mahibaloan nga nagpuyo ako niining henerasyon nga kauban ang ingon ka maayong pundok sa mga tawo, nga anaa sa tibuok kalibutan, nga akong nahibalag. Ako—ako gayud—mapasalamaton gayud kaayo ngadto sa Dios. Ug sa umalabot nga adlaw sa dihang moabot na ang pagpatawag kanako, bueno, akong—kinahanglan kong atubangon ang mga buhat nga gipangbuhat ko. Gusto nako nga kini mamahimong tanan nga kahimayaan ug kadunganan ngadto sa Dios.

⁸ Adunay daghang mga butang samtang ako . . . nagapaduol na kita sa Bag-ong Tuig nga akong—nga gusto ko unta nga mahimo ko nga—kalimtan na, apan kahibalo ko nga ako na kini gipangayoan og kapasayloan ingon nga mga kasaypanan

ngadto Kaniya ug—ug nga Iya nang gilabay ngadto sa Dagat sa Pagkalimot, ug dili na gayud kini Niya mahinumduman pa. Karon kita n'yo, wala kita gibuhat nga ingon niana, kanunay gayud kitang makahinumdum. Mahimo natong pasayloon ang usa'g usa, apan kita—dili kita makalimot niini tungod kay kita—kita—gihimo kitang lahi. Apan mahimo nga pasayloon kini sa Dios ug kalimtan na kini. Mahimo Niyang panason kini sama sa daw sa wala kini nahitabo. Kita n'yo? Tungod kay makaadto Siya nianang Dagat sa Pagkalimot, apan kita dili. Palandunga lang kini, nga dili man lang mahinumduman sa Dios nga nakasala kita. Hunahunaa kana! Mga mag-aawit, kamong mga batan-on, unsa kaha kung. . . unsa man kana? Dili man lang mahinumduman sa Dios nga nakasala kita sukad-sukad. Kita n'yo, mahimo Niyang kalimtan ang tibuok butang, ug nga dili na gayud mahimong hinumduman pa. Dili ba pagkatalagsaon kana?

⁹ Dili gayud kini lugar alang sa pagpakatawa. Wala ako nagatoo nianang mga pagpanistis o mga pagpakatawa sa. . . Nakapahinumdum kini kanako bahin sa usa ka—sa usa ko ka higala. Atua na siya sa Himaya karon. Apan siya—usa ka higayon nag-estorya siya bahin sa usa ka sugilanon, mahitungod sa usa—usa ka magtiayon nga mibalhin ngadto sa usa ka siyudad ug. . . nga gikan sa kailayahan. Ug aduna sila og usa ka. . . Kining batan-on pa nga magtiayon adunay amahan nga tigulang na, ug nga madasigon gayud sa Dios. Busa ang batan-ong babaye (iya kadtong amahan) nga. . . nakapakig-uban na gayud siya sa pipila ka klasikal nga mga tawo. Kahibalo na mo, kon diin nga aduna kamo niining tanan na nga matang sa mga pang-klasikal nga mga paglingaw-lingaw. Ug busa, magkaaduna siya niadto og usa ka matang sa paglingaw-lingaw nianang adlawa sa iyang balay.

¹⁰ Ug—ug ang iyang—ang iyang daddy, inigkahuman sa iyang paniudto, aba iyang—iyang kuhaon ang iyang Biblia ug moadto sa kuwarta ug mobasa sa makadiyut. Ug ibutang niya Kini, ug mohilak siya, ug mosinggit, ug mosiyagit, ug molihok nga wala sa lugar, ug motindog ug isul-ob ang iyang antipara ug mobasa pag-usab. Dayon pagmay makita, ug ibutang ang iyang antipara ug mosugod hilak ug singgit. Ingon niya, “Makadisturbo kana sa akong party busa akong—akong—kinahanglan ko nga. . . Kinahanglan nga aduna ko'y buhaton kay Dad, ug wala ko kahibalo kung unsay angay buhaton.” Busa nakadesisyon siya nga ipasaka niya siya itaas sa balay, ug pasakaon didto—pasakaon didto sa—sa maong dapit.

¹¹ Ug—ug nahunahunaan niya, “Bueno karon, dili mahimo nga ihatag ko kaniya ang iyang Biblia, tungod kay mao gihapon ang buhaton niya didto sa itaas.” Mao nga gihatagan niya lang siya og usa ka daan na nga libro sa Hiyograpiya, ug gipasaka na niya siya didto. Miingon, “Dad, pangtan-awa ang maong

mga hulagway sa tibuok kalibutan ug ang ingon nianang mga butang samtang nga naga-party kami.” Ug ang ingon, “Dili man mi magdugay. Kami—manaug na kami. . . Makakanaug ka na pagkataudtaod.” Ingon pa, “Kahibalo ko nga dili nimo gustong maanaa ka kon diin aduna silang mga babaye.”

¹² Miingon siya, “Dili, okay lang kana, Langga. Ako—mosaka na ako didto.”

¹³ Busa siya. . . Gibutangan niya siya og usa ka suga ug usa ka gamay’ng lugar. Ug hunahuna niya, “Bueno, kana—okay na ni. Karon, tan-awon niya lang ang maong mga hulagway ug magbasa-basa bahin sa—sa hiyograpiya, ug dayon. . . ug pagkataudtaod monaug na dayon siya. Ug mamahimong okay na gyud kini.”

¹⁴ Busa sa mga tungatunga na sila sa ilang pag-inum-inum sa ilang pink nga limonada, kahibalo na mo, ug nga naga-party sila. . . Pagkataudtaod, misugod og uyog ang balay, ug ang maong tigulang nga lalaki nagasugod na paanhi-paadto sa pagdalagan nga nagasiyagit ug nagalukso-lukso. Ug—ug hunahuna niya, “Unsa na ma’y nahitabo kaniya? Wala man siya’y Biblia didto. Kana. . . Nakakuha gyud siguro siya og Biblia.”

¹⁵ Mao nga dalidali siya nga misaka, ug miingon, “Daddy!” Miingon, “Dili Biblia kana ang imong ginabasa. Hiyograpiya kana.”

¹⁶ Miingon siya, “Kahibalo ko niini, Langga. Kahibalo ko niini! Apan” miingon, “kahibalo ka, sa miaging adlaw nabasa ko sa Biblia kon diin nag-ingon si Jesus nga Iya nang gilabay ang atong mga kasal-anan ngadto sa Dagat sa Pagkalimot, kita mo, ug dili na mahinumduman pa ang mga niini. Ug nabasa ko dinhi kon diin nagaingon sila nga dili gani nila makaplagan ang kinahiladman sa dagat sa pipila ka lugar, sa Hiyograpiya.” Miingon, “Hunahunaa gani, ila gihapon ginapadayon.”

¹⁷ Nagpalipay kadto kaniya. Busa makaplagan mo ang Dios bisan asa ka man motan-aw. Kita n’yo, kung motan-aw ka lang sa palibot, mosulti ang matag butang alang Kaniya.

¹⁸ Karon gayud, sa tinuod, akong—giingnan ko si Igsoong Outlaw, “Mahitungod ba sa unsa ang igasulti ko karong buntaga? Nasulti mo na ba ang pang-Pasko mo nga mensahe?”

Ang giingon, “Oo.”

Ingon ko, “Ang pang-Bag-ong Tuig mo nga mensahe?”

“Wala.”

¹⁹ Busa, aduna ko’y pipila ka mga outline dinhi tingali kon maimbitahan man ako sa kon asa man, mahisulti ko ang akong pang-Bag-ong Tuig nga Mensahe. Nahunahunaan ko nga ihatag ko kana kang Igsoong Outlaw alang sa iyaha, sa sunod semana.

²⁰ Busa hunahuna ko nga tingali balikan ko ang usa ka gamay'ng teksto dinhi nga medyo makapalangan kanato sa pipila pa ka minuto, kon itugot sa Ginoo. Ug nagasalig kita nga Iya kitang panalanginan. Gusto kong pasalamatan si Igsoong Outlaw ug ang iglesia dinhi, sa pagdapit kanako sa pagwali dinhi. Ug ako. . . Sama sa giingon ni Igsoong Outlaw, nga “ang among pagkahigala wala gayu'y pagkalawos,” nga ang grasya sa Dios ang nagpapabilin kanamong ingon niana sa tanan na niining mga katuigan. Kini ang pinakaunang iglesia nga nagdapit kanako, ug nga akong ginaanhian, sa Phoenix.

²¹ Kahibalo ko. . . Nagatoo ako nga si Igsoong Troll ang malantawan ko, dinhi. Dili ako sigurado. . . nga nagalingkod sa unahan. Husto ba, Igsoong Troll? Nagatoo ako nga uban siya niadtong higayona. Anaa pa kanako ang mga gamay'ng butang nga iyang gihatag kanako niadtong higayona; gamay'ng. . . ilang ginahulma kini o unsa man. Kahibalo na mo, gagmay'ng mga tumbaga nga gikan pa dinhi kon diin kamo nagapuyo. Ug tanawon mo ang palibot. . . Ug ginahunahuna ko lang kung daw sa unsa na kini kaha nianang buntaga sa dihang mitabok na kita didto, kahibalo na mo, ug makita ang maong mga tawo. . . moingon sila, “Hala, adunay. . .” Kahibalo mo, mamahimong lahi na gayud ang atong mga hitsura nianang tungora, kay sa kung unsa kita sa karon. Bueno. . . Husto kana. Wala na kanato ang unsa mang marka sa sala o sa pagkatigulang. Mamahingpit na kita. Oh, ginapangandoy ko kanang panahona (dili ba nga kamo man usab?) kon diin ang tanan nga mga problema wala na.

²² Ug karon, aduna ko'y usa ka Mensahe gikan sa Dios nga akong—nga gibati ko. Ug ako. . . Dili ko gusto nga mamahimong lahi, apan kinahanghan kong magmatinuuron. Ug kung dili ko isulti ang akong mga kombiksyon, kung ingon-ana dili ka magkaaduna og pagsalig kanako. Tungod kay ako—ako—mamahimo akong mas sama sa usa ka traydor o usa ka tigpakaaron-ingnon. Ug ako—gusto ko pang mamahimong bisan unsa man gawas lang niana, nakita n'yo. Mahimong mawad-an ko og pipila ka mga higala sa kalibutan, apan ako—gusto kong magpabilin nga matinuuron sa akong mga kombiksyon, sa kung unsay hunahuna ko nga husto.

²³ Karon, sa mga tuig nga nangagi, masayon pa kaayo kaniadto sa unang pagsugod ko; ug ang maong mga ilhanan, ug mensahe, ug ang pagwali. Bisan asa mang lugar andam modawat, “Ari ka! Ari ka! Ari ka! Ari ka!” Apan dayon, kita n'yo, ang matag ilhanan sa Dios adunay usa—usa ka Mensahe, usa ka Tingog. Kita n'yo, ginasundan Niini kini. Kung dili man. . . Wala nagahatag ang Dios og bisan unsa man nga ingon niana nga kalingawan lang ang paghatag niini. Siya—nagapadala Siya og usa ka butang aron danihon ang pagtagad ngadto sa kung unsa mang andam na Niyang isulti. Sama sa nagkaaduna kita niining maanindot nga pagkanta nga gihimo niining mga mag-aawit;

alang man sa unsa nga gihimo kini? Aron pahilumon na ang mga tawo para sa usa ka nagasingabot nga mensahe.

²⁴ Ingon niana kung unsa—ingon niana kung unsay ginabuhat sa usa ka ilhanan. Adunay mga ilhanan si Moises nga ato nang gihisgotan sa miaging gabii, ug kadto nga mga ilhanan adunay mga Tingog. Ug ang... sa dihang misulti na ang Tingog... Nagsige'g lakaw si Jesus sa pagpang-ayo usab sa mga masakiton. Usa Siya niadto ka bantugan nga Tawo. Apan sa miabot na ang panahon nga kadto—kadtong Propeta, nga atua sa yuta... Nga wala pa sila nagkaaduna og usa sulod sa upat ka gatus ka tuig, ug ania Siya kaniadto ibabaw sa yuta ug nga nagapamuhat og mga ilhanan. Niadtong tungora Siya'y "maayo kaayo nga tawo," gigustohan Siya sa tanan. Apan sa diha na nga ang Mensahe nga nagsunod niadto nga ilhanan (ang Tingog)... usa ka adlaw sa dihang milingkod Siya didto, ug miingon, "Ako ug ang Akong Amahan Usa ra." Oh, sus! Kadto—kadto—butang kadto nga lahi gayud. Sila—wala na nila nagustohan kadto. Kita n'yo?

²⁵ Ug ingon niana... ingon gayud niana ang kalibutan bisan pa man, mga higala. Kita n'yo? Sila... ang bisan unsa man nga mahimo nilang makuha, kung mahimo nila—kung may mapahimuslan sila, nakita n'yo... Nga ilang—nga mabati nila nga basta dili lang kini makapaproblema kanila, aba, ilang—hymoon nila kini. Apan pag-oras na nga gikinahanglan na nilang usabon ang ilang mga panghunahuna bahin sa mga butang, dinha na nagakaproblema.

²⁶ Karon, kita n'yo, nagatukod kita og usa ka bilding, dili usa ka paril. Gusto sa mga magtutukod mopahimutang og usa ka linya sa mga bloke ug nga idire-diretso na lang. Karon ang si kinsa man nga magtutukod makahimo niana. Apan gikinahanglan ang usa ka ekspertong mekaniko aron sa pagpaliko niini. Kita n'yo? Pag-kinahanglan mo na nga ipaliko kini, kana na ang oras nga nanginahanglan sa... mopakita kini kung ikaw—ikaw ba'y usa gayud ka kantero o dili; sa dihang mapaliko mo kini, ug matuman ang kahan-ayan niini sa uban pang bahin sa bilding, apan ang pagpaliko gayud. Karon dinhi niining mga pagpaliko na nga nagaabot ang mga problema. Gusto sa mga magtutukod nga ipadire-diretso ang pagtukod. Apan wala man kita nagatukod og usa ka paril; kondili, usa ka bilding.

²⁷ Karon sa pagahisgotan na nato kini, niining buntaga, iampo ninyo ako, ug akong... Kanunay ko kamong igaampo. Ug karon, iduko nato ang atong mga ulo sa makadiyut lang diha sa Presensiya sa Gamhanang Jehovah, ang Dios. Ug nga naamgo nato ang atong pagkaadunay kakulangan; kita tanan. Ug walay usa kanato nga ania dinhi nga walay panginahanglanon. Ug nahunahuna ko, nga samtang magaampo kita, kung aduna man kaninyo ang adunay espesyal nga panginahanglan?

28 Kahibalo mo, ang walay-kinutuban nga Dios, sama sa gihisgotan ko na dinhi sa Phoenix sa miaging adlaw sa—sa mao nga panagtigum dinhing lugara. . . Sama gayud sa telebisyon, nga nagaabot kini dinhi, si Cristo ania mismo sa maong bilding karon. Kita n'yo, ang matag lihok nga imong ginalihok, ang matag higayon nga mamilok ka, dili gayud kini mamatay. Anaa lang kini sa ether waves sa kawanangan. Wala kana gigama sa maong telebisyon. Ginakuha lang niini kanang signal kanimo, ug ginapagawas kini diha sa usa ka screen. Anaa kini dinha sa gihapon. Ingon niana kini sa una pa. Ang matag lihok nga imong nalihok sukad buhi sa gihapon, diha sa hangin. Karon, nakita n'yo na kung unsay mahitabo kanato didto sa paghukom?

29 Busa, ania ang Dios sa mao rang paagi. Dili nato Siya makita, sama lang nga dili nato makita kadtong mga hulagway sa telebisyon. Gikinahanglan niini ang usa ka tubo o kristal sa kung unsa man aron salu-on niini ang maong tingog, ug ipagawas niini og utro ang hulagway ug uban pa. Ania na kana sa ania pa si Adan sa yuta, apan nadiskobrehan lang nato kini. Ania ang Dios dinhi karong buntaga. Ug usa niining mga adlaw, sa Milenyum, mahibaloan nato kini. Mamahimo lang kining ingon ka mas tinuod kay sa anaa sa telebisyon o ingon-anang mga butang, nga ania Siya mismo dinhi sa tigum niining buntaga.

30 Karon samtang atong. . . sa ingon nianang panghunahuna, timan-i diha sa inyong kasingkasing kung unsay inyong mga panginahanglanon, ug itaas lang ang inyong kamot ngadto Kaniya. Mahimo n'yo ba kana? Moingon, “Ginoo, . . .” Ug diha sa inyong kasingkasing, pamalandunga kana nga panghunahuna.

31 Karon, Langitnong Amahan, aduna lamang kami niining usa ka pagduol, ug pinaagi kana sa dalan sa pag-ampo. Ug kami—nagaduol kami sa Ngalan ni Ginoong Jesus. Kami—dili kami takus sa paglitok niana nga Ngalan, sa paggamit Niini. Wala kami. . . nagahunahuna sa unsa mang paagi nga takus kami, kondili tungod kay gidapit kami sa pagbuhat niini. Ug sa pagkasayod niini, nga nag-ingon Siya, “Kung mangayo kamo sa Amahan og bisan unsa man diha sa Akong Ngalan, Akong—Akong—Akong igahatag kini.” Ug kami. . . kung makabarug lang ang among pagtoo niana, ingon nga Iyang Pulong ug kung Kinsa gayud Siya, kung ingon-ana nakasigurado kami nga maangkon namo kung unsay among ginapangayo. Nakita Mo ang matag hangyo. Nakita Mo ang akong kamot. Nasayod Ka sa akong hangyo.

32 Ug Amahan, nagaampo ako alang sa matag usa kanila. Nga ang tanan nilang panginahanglanon. . . Ginoo, wala ako nagatoo nga ang usa ka pundok sama niini mohangyo sa kung unsa man nga sayup. Mamahimo kini alang sa kung unsa man nga para sa pag-uswag sa ilang buluhaton, mahimo nga alang kini sa ilang pagkaayo; ug sa pagbuhat niana, buut nilang. . . o alang sa ila

mismong pagpanabut. Gusto nila kana aron nga mapalambo pa nila ang Gingharian sa Dios.

³³ Ug nagaampo ako, Dios, nga maihatag ang hangyo sa matag usa. Panalangini kini nga iglesia, ang pastor niini, ang mga kaabag niini, ang mga diyakono, mga tinugyanan, tanang mga miyembro niini, mga bisita, mga dumuloong. Dili sila mga dumuloong, Ginoo. Mga anak Mo kaming tanan pinaagi sa grasya ug pinaagi kang Cristo. Ug nagaampo kami nga igahatag Mo kanamo niining buntaga ang Tinapay sa Kinabuhi karon, nga mahimong mobiya kami dinhi nga may pagsabot nga kining mga hangyo nga among gihangyo naihatag na kanamo.

³⁴ Panalangini ang Pulong, Ginoo, samtang ginabasa ko Kini. Walay tawo nga—nga makahimo o makasarang sa paghubad niana nga Pulong. Nakita ni Juan ang maong Basahon diha sa kamot Kaniya nga naglingkod sa Trono, ug walay ni usa sa Langit, o sa yuta, o ilalum sa yuta nga takus bisan sa pagtanaw sa maong Basahon. Apan ang usa sa mga anciano nag-ingon, “Tan-awa, ang—ang Liyon sa Banay ni Juda nagmadaugon.” Si Juan, nga nagapaabot nga makita ang usa—usa ka liyon, nakita niya ang usa ka Cordero nga daw sa gipatay, usa—usa ka nagkadugo nga Cordero ang miduol ug gikuha ang maong Basahon, misaka sa Trono ug milingkod. Ug ang tanan nga inila sa Langit gipanghukas ang ilang mga purongpurong sa ilang mga ulo ug ningyukbo ug nasayod nga Siya ang mao’y takus.

³⁵ Ginoo, nagaampo kami nga moanhi Siya sa Trono sa among mga kasingkasing niining buntaga. Mosaka ug panag-iyahon ang matag panghunahuna nga aduna kami, ug nga dalhon ang Pulong ug magsulti kanamo aron nga maila pa namo og dugang Siya ug ang plano Niya sa among mga kinabuhi. Amo kining ginapangamuyo sa Ngalan ni Jesus. Amen.

³⁶ Karon, kung gusto ninyo ablihan ang inyong Biblia ngadto sa . . . Ang maong Kasulatan makita diha sa San Mateo sa ika-21 nga kapitulo, ug sugod sa . . . Siguro basahon nato ang—ang ika-10 ug ang ika-11 nga bersekulo sa ika-21 nga kapitulo sa Mateo. Ayoha gyud, pag-uli na ninyo, kung wala pa ninyo kini nabuhat sa tibuok panahon sa bakasyon, kung humanon ninyo sa pagbasa kini nga kapitulo. Maayo kaayo kini. Maayo gayud. Niini ilabina, alang niining okasyon, ug inubanan sa Mensahe nga ginalauman kong tugotan ako sa Balaang Espiritu nga ihatud kaninyo niining buntaga.

³⁷ Himatikdi ang ika-10 nga bersekulo samtang atong basahon, ug ang ika-11.

Ug sa pagsulod na niya sa Jerusalem, naukay ang tanan sa siyudad, nga nanag-ingon, Kinsa ba kini siya?

Ug ang mga panon sa katawhan miingon, Mao kini ang propeta nga si Jesus nga taga-Nazaret sa Galilea.

Karon atong. . . Hinaut nga idugang sa Dios sa Iyang Pulong ang—ang kahulugan niining gibasa nga Kasulatan.

³⁸ Karon nahibalo kita kung unsa nga panahon kini, ug daghan kaninyo ang nasayod na sa maong Kasulatan bahin niining kapitulo. Kini sa. . . sa adlaw kini mismo nga misulod si Cristo ngadto sa Jerusalem, nga nagasakay diha niining gamay nga asno. Ug atong. . . Adunay usa ka sugilanon nga nagaingon nga “usa kuno kadto ka puti nga asno.” Mahunahuna ko, diha sa usa ka paghulagway na daan mahitungod sa Iyang ikaduhang Pag-anhi nga nakasakay sa usa ka kabayo nga iggugubat. Niadtong higayona, nag-ingon ang propeta, nga “Magasakay Siya. . . Ang imong Hari nagaanhi kanimo nga nagasakay sa usa ka nati sa asno, ug nga mapaubsanon ug maaghop.” Ingon niana ang Iyang pag-abot ug—ug. . . nga nakasakay sa usa—usa ka asno, usa ka gamay'ng tigpas-an sa mga karga. Apan sa sunod nga higayon nga moabot Siya gikan sa Himaya (diha sa ika-19 ng kapitulo sa Pinadayag), moabot Siya ingon nga usa ka Gamhanang Magdadaug. Ang Iyang bisti nga gikatuslob sa dugo, nga nakasakay diha sa usa ka puti nga kabayo, ug ang tibuok panon sa Langit nagasunod Kaniya nga nakasakay sa puti nga mga kabayo. Ug ang sugilanon (dili nga basi sa Kasulatan o sa kasaysayan). . . Apan ang sugilanon nagatoo nga nagsakay Siya niadto sa usa ka gamay'ng puti nga asno sa pagsulod Niya sa Jerusalem.

³⁹ Karon nga. . . napili ko kini. . . mao gihapon. . . tungod nga ania kita sa mga landong sa. . . o ania sa panahon sa Pasko, ug—ug sa Bag-ong Tuig; ang talitapus na nga daang tuig, ug ang pagsulod sa bag-o na usab. Pila na lang ka adlaw gikan karon, daghang mga tawo ang mopakli na og bag-ong mga panid ug—ug mobuhat og bag-ong mga butang ug manaad og bag-ong mga pasalig; ug pagsugod na usab sa usa ka Bag-ong Tuig. Ug daw sa dili na gayud kini alang kanako og Pasko. Wala ko kahibalo kon ngano, kanunay kong gustong tawgon kini nga “Adlaw ni Santa Claus.” Kita n'yo? Tungod kay wala man gyud. . .

⁴⁰ Dili mahimong adlaw kini sa pagkahimugso ni Cristo. Siguradong dili gayud mahimong ingon niana. Malagmit nga natawo gayud Siya sa Marso o Abril, tungod kay Siya ang Cordero. Ug usa Siya ka lalaki nga carnero ug natawo nga ilalum sa *ram*, sa Aries. Ingon niana gayud, kita n'yo. Ug ang carnero dili nagakahimugso sa Disyembre bisan unsaon pa. Sa Tigpamulak nagakahimugso ang carnero. Ug dayon ang usa pa ka butang, ang mga bungtod sa Judea karon, baynte ka pye ang kabagaon sa niyebe niini. Unsaon man pagkahitabo nga maatua didto ang mga magbalantay sa carnero?

⁴¹ Busa sa tinuod nagagikan kini sa Romanhong mitolohiya, nga mao ang adlaw sa pagkahimugso sa maong diosdios nga adlaw. Sa dihang nagalabay ang solar nga adlaw, pataas ug pataas ang kaadlawon, ug nagakamub-an ang kagabhion. Ug

tali sa ika-20 ug sa ika-25 sa Disyembre mao ang pagkahimugso sa maong diosdios nga adlaw, ilalum sa Romanhon—Romanhong mitolohiya. Ug unya ang ilang diosdios. . . Ug unya ilang gisaulog ang pagkahimugso sa maong diodios nga adlaw. Ug si Constantine, ug—ug diha na sa paghimo sa konstitusyon sa iglesia ug sa gobyerno ug uban pa. Nag-ingon siya, “Usabon nato kini” (nga wala nahibalo kung unsa gayud nga adlaw kadto) “ug ipuli kini diha sa maong adlaw sa pagkahimugso sa diosdios nga adlaw, ug himoon kining: *Ang adlaw sa pagpakatawo sa Anak sa Dios.*” Kita n’yo? Nga. . . Apan wala kita kahibalo kung unsa gayud nga adlaw kadto.

⁴² Apan karon, ang sa ilaha, pagkadaghan na ang gipangwagtang mahitungod kang Cristo, hangtud nga ang tanan niini. . . ang uban gibalik ang mitolohiya mahitungod sa kung unsang linalang kaniadto, nga gipakaingon, sa ngalan nga San Nicolas o—o Kriss Kringle, usa ka mitolohiyang Aleman. Ug tanan kadto usa lang ka tumotumo, ug wala man lang si Cristo diha niini.

⁴³ Ug nanggihimo na ang mga tawo nga mamalit na og mga whiskey, ug—ug sa mga pagpangsugal na, ug sa mga urog. Ug ang usa—usa ka tawo nga. . . ang negosyante nga makabaligya sa iyang mga baligya sa tibuok panahon sa Pasko mahimo nang mabuhi sa tibuok tuig, halos. Kita n’yo? Ingon niana gayud kini ka dakung okasyon, sa pagpamaligya. Ug ang gagmay’ng mga bata sa dalan; nga ang ilang mga ginikanan walay ikasarang sa—sa pagbisita kanila nga may usa—usa ka regalo, ingon nga gikan kang Santa Claus, ug mangsuroy-suroy sila didto sa dalan, ug ang ilang mahugaw nga gagmay’ng mga kamot ug ang ilang namula nga mga mata. Ako—ayaw ko gayud makitang nagakahitabo kini. Kini angay nga usa ka maalampoon nga adlaw sa pagsimba sa Dios, inay nga usa ka kaguol sa kasingkasing ug sakit sa ulo ug ang maong mga butang nga nangahimo. Wala gyu’y Cristo dinha. Apan ania kita karon sa taliwala mismo niining tanan.

⁴⁴ Makaplagan nato ang atong mga kaugalingon, nga daw sa pareho kanila kaniadto. Kita n’yo, pagpasulod lamang kini karon ngadto sa usa ka dakung panahon sa kasaulogan. Paadto kaniadto si Jesus sa usa ka Kapistahan sa Pagsaylo. Ug misulod Siya sa Jerusalem. . . o pasulod na sa Jerusalem. Ug ang mga propesiya mahitungod sa tanan nga Iyang gibuhat matuman gayud. Ang tanan-tanan diha sa Biblia adunay kahulogan. Ang matag ngalan adunay kahulogan. Walay bisan unsa man nga nahisulat sa Kasulatan kondili adunay—adunay halawum nga kahulogan.

⁴⁵ Nagwali ako sa miaging gabii didto sa Tucson, bahin sa *Nganong Gikinahanglan Man Nga Mga Magbalantay Sa Carnero Imbis Nga Teologo?* Natawo Siya sa kilid mismo sa simbahan. Ug ang Balaang Espiritu nagpahalayo pa ngadto

didto sa kamingawan ug mingpili, dili mga teologo, kondili mga magbalantay sa carnero. Gikinahanglan gayud nga ingon niana. Siguradong wala unta mitoo ang mga teologo sa ingon nianang Mensahe. Busa sila...gikinahanglan niini nga mga magbalantay sa carnero.

⁴⁶ Miwali ako dinhi, pipila na ka tuig ang milabay, duha na ka tuig ang milabay, *Nganong Kini Man, Ang Gamay'ng Betlehem Gayud?* Kon itugot sa Ginoo, sa sunod nga Pasko, gusto kong iwali nato ang, *Nganong Gikinahanglan Man Nga Mga Mago?* Kining “Mga ngano?”—aduna sila’y mga tubag sa mga niini, ug ang mga niini ania mismo dinhi sa Biblia. Ug nagakinabuhi kita karon sa usa ka makahibulongang panahon, ang pinakahalangdon nga panahon sa tanang kapanahonan. Nagakinabuhi kita sa panahon kon diin, nga sa unsa mang panahon niini. . . mahimong mohunong na ang panahon ug masagol na niini ang Eternidad ug nga dire-diretso na. Ang kapanahonan sa mga propeta ug sa mga manggialamon, nagpaabot niini. Angay kitang mabinantayon matag oras, sa pagpaabot sa Iyang pag-anhi.

⁴⁷ Makaplagaan nato ang atong mga kaugalingon, sa niining Pasko, nga halos sama sa gibuhat nila bisan pa man sa niadtong nahaunang Pasko. Ang kalibutan halos magun-ob na. Sama sa giwali ko sa makausa, sa usa ka lugar, bahin sa usa ka pang-Pasko nga mensahe, *Ang Kalibutan Nga Nagakagun-ob Na*. Ug ang kalibutan hapit na nga magakadugmok pag-usab. Tan-awa ang mga linog dinhi dapit sa California. Ako nang ginasulti daan, sa dili pa ang pag-abot ni Ginoong Jesus, nga ipaunlod sa Dios kana nga lugar. Nagatoo ako nga ang Hollywood ug ang Los Angeles, ug silang mangil-ad nga mga lugar dito, nga ipaunlod sila sa Dios nga Makagagahum sa Tanan. Igaunlod sila ngadto sa kinahiladman sa dagat. Ug grabe na kaayo niini ang kasal-anan, nakita n’yo, kini mao ang balabag.

⁴⁸ Mibiyahe ang sibilisasyon kauban sa adlaw, gikan sa. . . ug misugod kini didto sa Sidlakan, paingon sa kasadpan. Ug anaa kini karon sa West Coast. Kung mopadayon man kini, pabalik na usab kini sa Sidlakan. Mao nga kana ang balabag. Ug ang kasal-anan mibiyahe dungan sa sibilisasyon, ug nahimo kining lunangan sa tanang kapanahonan. Ginapamuhat nila ang mga butang nga—nga dili man lang mahunahunaan sa mga tawo sa lain ubang kapanahonan ang ingon-anang mga butanga. Ang kababayan—an nga nagpasagad na sa ilang kaugalingon sa ingon nianang kahugawan, hangtud nga wala ni usa ka babaye sa unsa mang kapanahonan ang nakahunahuna man lang sa ingon niana nga matang sa butang sama sa ginabuhat nato karon. Ug dayon magpatawag kita sa gihapon sa atong mga kaugalingon nga mga Cristohanon. Pagkamakauulaw gayud!

⁴⁹ Dili katingad-an nga mitindog ang maong halangdon nga propeta, ug nag-ingon siya, “Dili ako propeta ni anak man sa usa ka propeta, apan. . .” Miingon:

Ang liyon mingulob na, ug kinsay dili mahimong mahadlok? Ug...Ang Dios namulong na, ug kinsay makahimo nga dili magpropesiya?

Kita n'yo? Aduna gyu'y kinahanglan nga manawagan.

⁵⁰ Ania na kita sa usa ka makuyaw nga takna; ang kalibutan. Apan ang Iglesia, ang tinuod nga Iglesia (dili ang denominasyon); kondili ang Iglesia, Mismo, andam na alang sa maong pinakadakung kadaugan nga nahimo Niini sukad-sukad: ang pagsugat sa Pamanhonon sa maong Pangasaw-onon.

⁵¹ Pahugno na kita, nga nagahulat sa usa ka mesiyas (o unsa man) nga moabot ug luwason kita, nga ipahilingkawas kita sa tanan niini. Tan-awon nato didto... ang mga kasamok didto sa Sidlanan. Tan-awon nato didto sa Africa ang mga pagrebelyon batok sa kagamhanan, ug ang mga problema bahin sa kaliwat, ug ang mga pagkausa, ug—ug mga pagpanglain. Ug nagsige kitang tanan og siwitsiwit ug nanagtiyabaw dinhi dili pa lang dugay (ang itum natong mga higala) bahin sa, “Kinahanglan aduna kita, kinahanglan aduna kita og pagkausa. Kana ang atong gikinahanglan. Kinahanglan aduna kita'y pagkausa; matag tawo, managsama ra, ang matag tawo.” Bueno, tuman ka husto kana. Tuman ka husto kana. Wala ako nagatoo sa pagpangulipon. Una sa tanan dili sila mga ulipon. Dili sila mga ulipon.

⁵² Usa ka tigpahilain ang Dios. Mao usab ako. Ang si kinsa man nga Cristohanon usa ka pagpahilain. Ginapahilain sa Dios ang Iyang katawhan gikan sa tanang uban pa kanila. Sila'y... Dugay na silang usa ka pagpahilain. Nagpili Siya og usa ka nasud. Nagapili Siya og usa ka katawhan. Usa Siya ka tigpahilain. Gibuhat Niya ang mga kanasuran. Apan sa gihapon, ang usa ka tinuod nga Cristohanon kinahanglan mamahimong usa ka tigpahilain. Ginapahilain ang kaugalingon niya gikan sa mga butang nga iya sa kalibutan ug tanan na, ug nga mahisulod ngadto sa usa ka katuyoan, si Jesus Cristo.

⁵³ Apan ginasiyagit nila kana. Gisulayan ko nang sultihan sila, “Dili kana mao ang butang nga magaluwas sa atong nasud. Usa lang kana ka pulitikanhong pamaagi. Usa kini—usa kini ka butang nga may pang-komunistang taras.” Nagatoo ako nga pangunahan ni Martin Luther King ang iyang mga tawo paingon ngadto sa pinakadakung pagpamatay, ug pagpang-masaker, nga ila pa lang gayud masinatian. Ug sila... Nakita n'yo, dili kana makapagpahiusa sa kalibutan. Dili kana makaluwas kanato. Gihatagan nato sila og pagpakighiusa. Karon mas misamot pa kini kay sa kaniadto. Kita n'yo, dili kana ang...dili kana ang pangutana. Adunay usa lang nga makahimo niana: ang Dios. Ug siguradong ayaw nila Niini.

⁵⁴ Dili nila gusto Siya kaniadto. Nagakahugno na sila kaniadto, ug nagakahugno na ang ilang pang-gobyerno, nagakabahin na

ang ilang nasud, nagakabahinbahin na ang ilang iglesia, ug nagatuaw sila alang sa usa ka Mesiyas. Gikinahanglan nila Siya. “Oh, padalhi kami og usa ka Mesiyas.” Pero sa dihang miabot na Siya . . .

⁵⁵ Ang Dios naghatag . . . nagatubag sa inyong pag-ampo. Nangayo ka, ug ikaw makadawat. Ug kana . . . mahimo akong mohunong dinhi sulod sa daghang mga oras, mahitungod sa mga kalalaken-an og kababayen-an, mga Cristohanon pa, nga nanggiampo alang sa usa ka butang; ug nga gihatag na sa Dios ang tubag ug wala nila maila kini bisan pa man.

⁵⁶ Ug karon, gihatag na *kanila* sa Dios ang tubag. Nanginahanglan sila og usa ka Mesiyas. Nasayod sila nga nagkaaduna na sila og mga Cesar, ug nagkaaduna na sila—nagkaaduna na sila og mga David, nagkaaduna na sila og mga Solomon (ang lalaking manggialamon), nagkaaduna na sila og mga David (kusganong mga manggugubat), sila—nagkaaduna na sila og tanan na nga matang, apan nasayod sila nga nanginahanglan sila og tabang gikan sa Langit ug sila . . . Nagsaad na kanila ang Dios og usa ka Mesiyas. Ug Iyang gipadala ngadto kanila kana nga Mesiyas, diha sa pagtubag sa ilang pag-ampo, apan ayaw nila Kaniya.

⁵⁷ Ginahunahuna ko, karon, kung ang ato kaha nga mga pag-ampo . . . Madungog mo silang nanag-ingon, “Mag-ampo alang sa usa ka rebaybal. Mag-ampo alang *niini*. Mag-ampo alang sa usa ka pagpakaylap. Mag-ampo alang sa usa ka paghiniusa.” Ginahunahuna ko, nga kung mopadala kaha ang Dios og usa ka programa, kung dawaton kaha nato kini. Ginahunahuna ko kung dawaton kaha nato kung unsa ma’y ginapadala Niya kanato. Nakita n’yo, Siya . . . Ang hinungdan nga nagaampo kita alang niining mga butanga, tungod kay nasayod kita nga kinahanglanon kini. Apan sa diha nga ginapadala na kini sa Dios sa Iyang gustong pamaagi niini, unya dili kini pinasubay sa atong kagustuhan, ug busa nga ayaw natong dawaton kini. Ug ingon niana kini niadtong panahona. Kung wala Siya sa kagustuhan sa ilang tinooan ug sa ilang . . . Ilang—dili nila Siya pagadawaton pag-usab, sa karon. Mao kana ang hinungdan nga ilang gisulti kini nga pangutana, “Kinsa man kini? Kinsa ba kining Tawhanang nagaabot?” Kita n’yo, usa kadto ka—ka pagkamahinungdanon nga panahon. Oh, ang tanan kaniadto . . . dili mahimutang. Adunay butang nga mahitabo na gayud.

⁵⁸ Ug tan-awa ang kalibutan karon, daw sa unsa ka-dili mahimutang nga kahimutang ang anaa karon sa tibuok kalibutan. Mobiyahe ka diha sa dalan . . . Kini—dili na gani siguradong-luwas sa pag-drayb. Dili siguradong-luwas ang maanaa ka sa lapad nga karsada nga upat ang linya sa dalan. Ang tanan na’y tensyonado, masuko na lang dayon ug . . . Unsa ba’y problema? Magkalma lang. Asa ka ba paadto? Mao kana ang nagapapuno sa tambalanan sa mga buang. Mao kana ang naghatud sa iglesia

ngadto sa ingon nianang kagubot. Sila—pahinayak sila dayon sa kung unsang butang. Dili sila manghunong usá ug mamalandong sa Pulong sa Dios, ug sa takna nga ato karon gikapuy-an; ang tanan anaa na sa pagkahingawa, dili-mahimutang.

⁵⁹ Ug karon, kita nasayod. Kita nahibalo. Bag-o pa lang miagi ang kalibutan sa usa ka dakung mga kasakit sa pagpanganak. Ug nagaagi ang iglesia sa usa ka kasakit sa pagpanganak. Kinahanglan nga moagi kini sa kasakit sa pagpanganak sa dili pa kini makahatag og . . . Matag usa sa mga propeta, sa pag-abot nila dinhi sa kalibutan, usa kadto ka kasakit sa pagpanganak alang sa iglesia. Miagi na ang kalibutan sa Nahaunang Gubat sa Kalibutan, Ikaduhang Gubat sa Kalibutan, ug nahiamand na kini karon alang sa Ikatulong Gubat sa Kalibutan. Ug ania kini usab sa mao nga kasakit sa pagpanganak. Apan adunay usa lang ka butang nga makahatud og kalinaw, ug kana si Cristo.

⁶⁰ Ang tanan nga atong mga pamaagi, ug atong mga ideya, ug atong pang-simbahan nga mga pagpauswag, ug tanan nga atong mga pangagamhanan, ug ang atong tibuok siyensya ug tanan na, napamatud-an na kining walay pulos. Ug dayon moampo kita sa Dios aron—aron tabangan kita, aron motabang, “Ari Ka ug buhata ang butang alang kanamo.” Ug dayon sa diha nga ginabuhat na Niya, ginahunahuna ko lang kung mahimo kaha nato nga sabton Kini; kung mahimo kaha nato nga dawaton Kini; o pamalandungan man Kini?

⁶¹ Karon ingon niana kung unsa ang gipangbuhat sa kaniadto nga mga panahona. Dugay na sila nga nagaampo, nagkaaduna sila’y tanan na nga matang sa mga halangdon nga mga lider, napailalum na sila sa mga pangagamhanan, napailalum na sila sa mga pagmando sa hari, napailalum na sila sa tanan na, sa mga maghuhukom. Apan nasayod sila nga adunay usa lang ka butang nga makaluwas kanila, mao kadto ang paanhi na nga Mesiyas. Ug ang *Mesiyas* nagakahulogan og “ang dinihogan.” Usa ka tawong dinihogan. Dayon ang mao nga tawo, dinihogan sa Pulong. Ang Pulong nga nahimong unod sa atong taliwala. Ug sa dihang miabot Siya, Siya—eksaktong wala gayud Siya sa kagustuhan nga ilang gusto diha Kaniya; wala sa kagustuhan nila kaniadto . . . nga angay Siyang moabot. Mao nga sila—sila—sila nakasinggit, “Kinsa kining tawhana? Bahin sa unsa ba kining tanan nga gikaguliyangan?” Atua didto sa ganghaan ang pundok sa mga mag-uuma, nga namali og mga lukay ug . . .

⁶² Ug miingon siya, “Aba, nganong dili sila manghilum. Ginapanerbiyos lang nila kita, sa ilang mga pagsiniyagit, ug pagpanghugyaw, ug pagpanglihok nga wala sa lugar.”

⁶³ Ingon Niya, “Kung manghilum man sila, managsinggit kining mga bato dayon.”

⁶⁴ Oh, nagapadayag na ang takna! Nagakatuman na ang propesiya. Dili ikatingala! “Nagangulob na ang Liyon, ug kinsa

man ang dili mahadlok? Ug namulong na ang Dios. Kinsa man ang makahimo nga dili mopropesiya?”

65 “Dili, kung wala gayud Siya nahisubay sa among kagustuhan. . . Kung dili Siya sa ingon nianang pamaagi nga gusto namo Kaniya, sa paagi nga gidahum namong angay Siyang moabot, dili namo Siya pagadawaton.” Kung ingon-ana, ang ila kadtong mga kredo ang nagpahilayo kaayo kanila sa sinulat nga Pulong. Pagkahalayo na nila, nga napakyas sila sa pag-ila Kaniya Kinsa mao’y ilang giampo nga moabot. Kadtong mga iglesiaha ang nagpahilayo kanila kaayo, hangtud nga ang mismong butang nga ilang giampo, atua na mismo kauban nila, ug wala kadto nahisubay sa ilang kagustuhan, ug busa sila—sila—sila dili makatoo Niini. Gikinahanglan nilang likayan Kini. Ilang gipahawa Kini. Sila. . . Adunay usa lang ka butang nga mahimo mo sa dihang matagbo mo si Cristo. Kana mao ang pagdawat ba Kaniya o pagsalikway Kaniya. Dili ka mahimong molakaw lang nga walay pagpili. Dili mo mahimo kana. Kini—wala kini napahinungod kanimo nga buhaton kini. Ingon lang niana gayud kana.

66 Himatikdi lang, pagkadiyutay lang ang nakaila Kaniya ingon nga mao ang Dinihogan nga Pulong, niadtong adlawa. Kita n’yo, ang Dios sa kinasugdanan, ingon nga walay-kinutuban, ug nga nasayod sa tanang butang sa kinasugdanan pa lang. . . Ug ang bugtong butang nga ingon niini kining mga butanga mao ang pagpasundayag niini sa Iyang mga kinaiyahan. Ang kinaiyahan. . . Aduna ka’y kinaiyahan. Kini ang imong hunahuna. Aduna ka’y butang nga *hunahunaon*, dayon *isulti* mo kini, dayon *gamiton* kini. Ingon niana ang Dios. Siya, sa kinasugdanan. . . Kung ikaw. . . Kung ikaw man atua na o maatua man sa Langit, atua ka na sa Langit sa sugod pa lang. Kabahin ka sa Dios. Ikaw anaa sa Iyang hunahuna kaniadto. Nakaila Siya sa imong ngalan. Nakaila na Siya kanimo sa wala pa nagkaaduna og usa—usa—usa ka molekula, sa wala pa nagkaaduna og kahayag. Sa wala pa’y bisan unsa pa man, nakaila na Siya kanimo ug sa imong ngalan. Ug gisulat kini didto sa Libro sa Kinabuhi sa Cordero, sa wala pa gayud naporma ang kalibutan. Kita n’yo, anaa ka sa Iyang hunahuna kaniadto. Ug dayon ang. . . Dayon nahimo kang usa ka Pulong. Ug ang pulong usa—usa ka pulong nga gipahayag. Dayon gikapadayag ka na.

67 Ingon niana kung unsa Siya. Siya sa Kaugalingon lang Niya sa kinasugdanan pa. Nag-inusara kaniadto ang Dios kauban sa Iyang mga hunahuna. Dili na Niya gayud kana mabuhat pag-usab tungod kay ang Iyang mga hunahuna gikapadayag na. Ug mao kana kon ngano nga ania kita mismo dinhi, karong adlawa. . . ang Dios nga nagapakigkauban sa Iyang mga anaa sa hunahuna, ingon nga naipadayag na. Kita n’yo? Ingon niana kita. Busa, kamo, sa pagkaguol, dili makadugang og usa ka takna sa gitas-on sa inyong kinabuhi. Dili ninyo mahimo *kini*, *kana*,

o uban pa. Ang Dios niini nga nagakaluoy. Ang Dios. “Ang tanan nga gikahatag sa Amahan Kanako magaaari Kanako, ug walay si kinsa man ang makahimo sa pag-ari Kanako gawas kon pagadanihon siya sa Akong Amahan.” Mao na kana.

⁶⁸ Karon, himatikdi lang, kung daw sa unsa ka diyutay kanila kaniadto sa Iyang panahon, sa minilyon nga atua niadto sa kalibutan, nga wala man lang gani nahibalo bahin sa Iyang pagkaania dinhi. Hunahunaa lang, aduna niadto og tignapulo . . . minilyon ka mga tawo nga walay hibangkaagan bahin niini. Ug ang hunahunaon, nga ang Israel niadtong panahona, adunay duha ug tunga ka milyon ka mga tawo kaniadto sa Palestina, nga mga Israelinhon, ug wala ni usa sa usa ka gatus kanila ang nasayod man lang niini. Dili ikatingala nga nag-ingon Siya, “Masigpit ang pultahan ug hiktin ang dalan, ug mamahimong diyutay ra ang makatultol niini.” Hunahunaa lang kung unsa ka daghan ang wala nakaila Kaniya! Mga wala nahibalo nga Siya Kadto. Ug sila nga atua lang mismo sa duol kung asa man Siya niadto; mao kana ang makaluluoy nga bahin.

⁶⁹ Kadtong mga nanaglakaw kauban Niya, ug nga nakakita Kaniya didto sa dalan, ug uban pa . . . sila—wala sila nakaila Kaniya kung Kinsa Siya kaniadto, tungod kay gisigurado ni Satanas nga magkaaduna Siya og—og pinakamahugaw nga ngalan nga mahimong igatawag sa usa ka tawo. Gitawag Siya kaniadto sa kalibutan (sa natural nga kalibutan) . . . Siya—gitawag Siya niadto nga usa ka ilihitimo (tungod kay miingon siya “ang maong inahan, mamahimong inahan Niya, sa poder ni Jose, sa wala pa kini maminyo kang Jose”). Busa gihinganlan niya Siya sa ilihitimong Ngalan.

⁷⁰ Ug usab, ang—nakita Siya sa iglesia diha sa Iyang dakung gahum sa pagpadayag. Pagpadayag sa unsa? Dili sa pagpadayag sa kredo! Gipadayag Niya niadto ang Pulong! Siya ang Dinihogan nga Pulong, Siya Mismo. Ug sa nakita nila kadto nga nagakahitabo (ang maong pagpadayag, ang Dinihogang Mesiyas), ila Kadto nga gisalikway. Ayaw nila Kadto. Wala nahisubay Kadto sa ilang kagustuhan. Mao kana ang makaluluoy nga bahin. Unsa ka daghan . . . ? Hunahunaa lang kini! Sama lang gayud sa uban pang panahon.

⁷¹ Kita n’yo, ang matag usa adunay ilang kaugalingong interpretasyon sa Pulong. Ingon niana kung unsay . . . ang hinungdan nga wala naila sa Israel si Moises. Mao kana ang hinungdan nga wala naila sa kalibutan si Noe. Mao kana ang hinungdan nga wala naila ang tanan nga mga propeta. Aduna sila’y ilang kaugalingon nga interpretasyon sa Pulong. Apan ang Dios, sa matag kapanahonan, nagkaaduna Siya’y Iyang Mesiyas. Kita n’yo? Ang pagsalikway niadto sa Mensahe ni Noe, mao’y pagsalikway sa Dios. Ang pagsalikway kang Noe, mao’y pagkalaglag. Ang pagsalikway kang Moises, pagkalaglag. Kadto’y . . . Sila kaniadto ang Dinihogang Mesiyas

alang niadtong kapanahonan, ang maong Pulong nga gikasaad alang niadto nga kapanahonan. Ug sa dihang miabot si Jesus, Siya ang maong kahupnganan sa Pulong.

⁷² Ang Dios, Mismo, nga nahimo sa porma nga tawo, nga may bukog ug unod; ang Maong Dinihogan. Ug nakita na nila unta kadto. Apan nakita n'yo, ang ilang—ang kalibutan nilang pang-simbahan nagdugang na og ayo dinhi ug nagkulang dinhi ug—ug uban pa, hangtud nga nagkalamukat na og maayo kadto hangtud nga misalig na sila—mismo sa ilang iglesia imbis diha sa—sa Pulong. Ug sa makita nila ang ilang iglesia gidihogan, nagdahum sila dayon nga daw sa adunay dakung butang ang nagakahitabo. Apan sa dihang nakita nila ang—ang dinihogan nga Pulong, nanag-ingon sila dayon, “Panatisismo kana. Kining tawhana usa ka yawa, usa ka Beelzebu.” Tungod kay supak kadto kaayo sa ilang iglesia hangtud. . . ang mga kredo na sa ilang iglesia ug kung unsa pa nga ilang gipanghimo. Ug ingon niana kadto matag anhi sa usa ka propeta, nagkalamukat na og maayo ang iglesia.

⁷³ Gipadala niadto sa Dios ang Iyang mga kasugoan ug gihatagan sila og usa ka pakigsaad. Ug mosulod ang pari ug tipyasan, ug dugangan, ug tangtangan dinhi, ug mohimo og kredo gikan niini. Ug dayon, ang Dios mopatungha gikan sa kung asa man, usa ka lalaking dinihogan nga pinatungha diha sa gahum sa Espiritu. Ug kanunay siyang gikadumtan sa mga pari, sa mga hari. Ug—ug kon diin nga ang mini nga mga propeta nanagsul-ob sa ilang hamili nga mga panapton, ug nanaglakaw nga mapaubsanon, ug nga malumo sa taliwala sa mga hari ug sa mga kaparian, aron makadawat og madungganon nga mga ngalan ug—ug ingon nianang mga butang. Dayon ang tinuod, matuod nga propeta, migikan sa kung asa man, nga dili sa ilang mga organisasyon.

⁷⁴ Asa—asa man dinha sa Biblia, kon diin mipili ang Dios og usa ka pari ug gihimo siya nga usa ka propeta? Asa man makita kon diin mikuha ang Dios og usa ka teologo sa simbahan (binansay nga lalaki, binansay nga lalaki sa teolohiya) ug gihimo siya nga usa ka propeta? Wala sukad-sukad diha sa mga kasaysayan bisan asa man, nga gihimo Niya gayud kini, sa unsa mang kapanahonan. . . nga Iya gayud gibuhat kini. Gikinahanglan Niyang magpahilayo niana nga sistema, ug ipatungha kini. Ug ingon niana ang Iyang gibuhat dinhi.

⁷⁵ Si Jesus, sa natawo Siya didto sa Betlehem sa Judea, nga gikan sa usa ka kabus nga pamilya, ug wala Siya'y kaagi sa nasayran nila, usa lang sa mga banay ni—ni Judah, ug ang Iyang inahan ug amahan gikan sa kaliwat ni David; ug gikinahanglan nila kaniadto nga moadto didto ug nga mabuhisan. Ug ania Siya, usa lang ka batan-on, nagalibot-libot. . . walay ginabuhat kondili mangbungkag og mga kasimbahanan. Ug ila Siyang gikadumtan. Ug wala sila'y masulti gawas sa kung unsay nangabuhat nga mga milagro niadtong tawhana. Gipahayag

kana ni Pedro niadtong Adlaw sa Pentecostes, nga miingon, “Si Jesus, nga Nazaretnon, nga gipamatud-an kaninyo sa Dios, nga anaa ang Dios Kaniya.” Ug dili nga modugang sa Iyang Pulong o unsa man; sa pagpaklaro pa niini: “Siya ang Dios nga nahimong unod nga nakig-uban nato. Ang Dios uban kanato.”

⁷⁶ Ug sa gikasulti na sa miaging gabii, nga si Moises, nga nagtindog didto nga ginasuksuk ang iyang kamot sulod sa iyang dughan, siya . . . ang Dios kadto nga atua kang Moises. Siya . . . (nga ginakuptan ang mga tinago didto sa iyang kasingkasing), ug gituy-od kini nga namuti sa sanla. Dayon gibalik kini ngadto sulod sa iyang dughan ug naayo kini, ug dayon gituy-od kini pag-usab ngadto kanato sa dihang gipadala Niya didto ang Balaang Espiritu; nga mao ang Dios, pag-usab, nga diha lang sa usa pa ka porma niadtong Adlaw sa Pentecostes. Ug ginasalikway nato Kini. Ayaw nato Niana. Ingon niana ang gibuhay nila kaniadto. Ingon niana ang atong siguradong buhaton niini sa karong panahon.

⁷⁷ Makita nato, ang matag tawo adunay iyang kaugalingong interpretasyon. Mao kana kon ngano makalilibog na kini kaayo. Apan kahibalo mo, nag-ingon ang Biblia, nga, “Kini nga Pulong dili mahimong isaysay sa kinaugalingong pagpanabot.” Wala Kini nagkinahanglan og pang-Presbyterian nga interpretasyon Niini. Wala Kini nagkinahanglan og usa ka pang-Baptist nga interpretasyon. Ni nagkinahanglan man Niini og usa ka pang-Pentecostal nga interpretasyon. Ang Dios ang kaugalingon Niyang tighubad. Nag-ingon Siya nga buhaton Niya kini, busa nga ginabuhay Niya kini, ug mao na kana. Busa ingon niana kon ngano nga makita nila ang dinihogan nga Pulong sa saad ug dayon sila—dili nila madawat Kini. Nakita n’yo, tungod kay supak Kini sa ilang—ilang mga kredo.

⁷⁸ Unsa man ang mamahimong hitsura sa Mesiyas (Ang Dinohogan), ug unsa ma’y Iyang pagabuhaton; halayo kadto sa ilang mga pagpanabot. Ug dayon sa diha nga nahibasa Kini ngadto kanila gikan sa mga Kasulatan, kung unsa’y Iyang pagabuhaton, sa gihapon dili nila Kini masabtan. Kay sa diha nga kining maong mga mago miadto didto, nga gikan pa didto sa Babilonia, medyo didto sila dapit sa amihanang-sidlakan gikan sa Jerusalem, ug milantaw didto ug nakita kadtong Bitoon nga paingon sa kasadpan. Gisundan nila Kini sulod sa duha ka tuig, milusong didto patabok sa Suba sa Tigris, ug agi sa mga walog ug sa Shinar, ug paubos didto, padulong sa pinaka-ulo nga siyudad sa tanang mga relihiyon. Ang pinakabantugan nga relihiyon sa tibuk kalibutan, sa sulod sa templo, sa Jerusalem. Ug nga nagsige paanhi ug paadto sa kadalanan nga nagaingon, “Hain man Siya? Hain man Siya nga gipakatawo nga Hari sa mga Judio?” Aba, walay si kinsa man ang may hingbangkaagan bahin niini. Pagkatalagsaon kadto.

⁷⁹ Nagpaukay kini bisan pa ngadto sa Sanhedrin... gipangtawag ang mga iskolar ug miingon, “Basaha ninyo sa mga Kasulatan kung asa kaha ang Mesiyas . . .”

⁸⁰ Ug milakaw sila ug gikuha ang—ang mga Kasulatan ug gibasa sa makusog nga si Micah nag-ingon nga, “Gikan . . . sa Judea . . . sa Betlehem sa Judea, dili ba ikaw ang labing ubos sa tanang mga punoan? Apan gikan kanimo mogula kini nga pangulo.”

Kita n'yo, imbis nga susihon, wala gayud nila kini gipanumbaling, “Bueno, usa ra kini ka pundok sa panatissimo.” Kita n'yo? Ingon niana kon ngano nga gidawat sa mga magbalantay sa carnero ang Mensahe. Kita n'yo, dili sila . . . Aduna sila'y ilang kaugalingong interpretasyon, busa, sila—nasipyat nila ang maong tinuod og matuod nga butang.

⁸¹ Apan sama sa naandan na sa una pa, pag-moabot Siya, nagaabot Siya sa ingon ka eksaktong paagi nga giingon na sa Pulong nga moabot Siya. Miabot Siya sa maong siyudad sa ingon ka eksakto gayud, diha sa atong teksto karong buntaga, sa paagi nga giingon na sa Pulong nga moabot Siya. Ug nanag-ingon sila, “Kinsa man kini?” Makita ba ninyo kung unsay akong ipasabot? Angay nga naila unta nila kung kinsa kadto. Ug ania . . . dili nga ang kalibutan sa gawas, kondili ang kalibutan sa iglesia nga maoy nag-ingon, “Kinsa man kini? Kinsa man kini?” Sa dihang, dinha, klaro nang nag-ingon ang mga Kasulatan nga ingon niana gayud Siya ka eksaktong moabot. Ug moingon sila, “Kinsa man kini? Kinsa man kining tawhana? Alang man sa unsa kini nga mga emosyon? Pahunonga kana nga mga pagsaba. Ginapanerbiyos ra kami niana.” Uh-huh. Kita n'yo? Ang . . . Kita n'yo? Ang mismong butang nga dugay na nilang giampo atua mismo nga makab-ot na nila, ug wala nila Siya mailhan. Ug miabot Siya sa ingon gayud ka eksakto nga giingon na sa Kasulatan nga moabot Siya. Ug kung moabot man Siya karon, moabot Siya sa paagi gayud nga ginaingon sa Kasulatan nga moabot Siya. Kanunay Siyang nagaabot diha sa kagustuhan sa Pulong sa Dios, ug dili diha sa kagustuhan sa kung unsang ideya sa teologo bahin niini.

⁸² Lain pa'y ako, kahibalo ba mo nga ang Pulong sa Dios wala gayud sukad miabot ngadto sa usa ka teologo? Pangitaa sa Kasulatan kon diin nga kini gibuhat Niini. Wala nagaabot ang Pulong ngadto sa mga teologo; wala gayud. Apan nakita n'yo, kung ang Pulong nahipadayag man karon, ang Pulong nga alang sa atong panahon, mosubay Kini sa kagustuhan sa Pulong sa Dios. Dili uyon sa kagustuhan sa ideya sa kung kinsa man. Gamiton sa Dios ang Iyang Pulong nga Iya nang gikasaad alang niining panahona, ug dihogan Kini, ug matuman Kini. Kana lang. Walay paagi nga mapugngan Kini sa pagkatuman. Mamatuman kini bisan unsaon pa, bisan unsa pa'y ginaingon sa iglesia ug kung unsa man ang ginatoohan sa uban pa kanila.

Kini . . . Buhaton kini sa Dios bisan pa man. Magkaaduna og gamay ra gayud ang makaila niini. Husto kana, gamay ra kaayo. Ingon na niana kini daan.

⁸³ Kita n'yo, tungod sa kaugalingon nilang interpretasyon, wala na sila'y uban pang mahimo kay nag-agad na lang sila sa kung unsa ma'y giingon na kanila sa iglesia. Apan moabot Siya . . . Kanunay na Siyang nagaabot kaniadto . . . Miabot Siya kaniadto, diay, ug buhaton Niya sa matag higayon nga moabot Siya, ug ang tanan nga buhaton Niya, mosubay kini sa kagastuhan sa Pulong. Mao nga, dili nato mahimong ibutang ang atong pagsalig sa kung unsa ma'y ginaingon sa ubang tawo. Adunay usa lang ka butang nga mahimo mong butangan sa imong pagsalig, ug kana mao ang Pulong. Ug ang Pulong mao ang Dios. Ug ang dinihogan nga Pulong mao ang Mesiyas; ang dinihogan nga Pulong sa maong takna. Pagkamaanindot gayud! Nasipyatan nila kini, ang Pulong; ang hustong . . . Aduna sila'y . . . Kanunay'ng husto ang Pulong, apan ang ilang interpretasyon Niini mao ang sayup.

⁸⁴ Ginahunahuna ko kung kining dakung butang, kining Ecumenical Council nga aduna kita sa kalibutan karon, ug ang World Council of Churches nga nagakahiusa na aron hiusahon kitang tanan . . . Ginahunahuna ko kung naamgo kaha nila kung . . . Eksaktong ingon niana gayud kung unsay giingon sa Kasulatan nga ilang pagabuhaton. Apan abi nila nga kini ang pinakamaanindot nga butang sa kalibutan, nga magkagunitay kitang tanan ug maghiniusa. Miingon, "Nag-ampo daw si Jesus aron nga mamahimong usa kita." Tinuod kana. Pero dili ingon niana nga pagka-usa.

⁸⁵ Ang ingon Niya, "Magma-usa kamo ingon nga Ako ug ang Amahan usa ra." Oo, magma-ingon niana nga matang sa pagka-usa. Kung ingon-ana unsaon man pagkaingon niana? Ang Pulong nga ania kanato ang maoy mamahimong dinihogan nga Pulong. Ingon niana ang pagka-usa sa Dios. Kita n'yo, ang pagka-usa sa Dios mao ang Pulong nga dinihogan diha kanimo. Kita n'yo? Ug dayon nahimo kang usa ka anak (usa ka mesiyas) sa maong kapanohonan.

⁸⁶ Karon makaplagan nato nga ang mga tawo halos mao gihapon. Wala nagabag-o ang mga tawo. Nabahinbahin kini nga mga tawo sa tulo ka mga grupo. Ug tan-awon nato kana sa pipila ka mga minuto karon. Kahibalo ko nga malangan gayud ako og diyutay, kung okay lang kini kaninyo. Mahinay gyud ko, ako—ako—ako lang . . . wala ko kahibalo; Ako—mosulod ako ug mosulat og mga Kasulatan, ug diyutay'ng mga sinulat. Ug dayon ako—pag atua na ako ug sa—sa nagunitan na sa Balaang Espiritu ang usa niini, ug ako—ako—ako—ako . . . daw sa wala na gayud kini kahunongan. Padayon na lang gayud kini nga padayon. Apan, karon, sa atong teksto.

⁸⁷ Nabahinbahin sila, didto, sa tulo ka mga grupo, nga adunay tulo ka nagkalainlaing mga hunahuna. Ang uban kanila mitoo Kaniya. Ang uban kanila nagdumot Kaniya. Ug ang uban kanila wala kahibalo kung unsay buhaton.

⁸⁸ Kita n'yo? Kana—sa ingon niana nato kini nakuha. Nagwali ako, sa pagtoo ko dinhi niining iglesia, kanhi sa: *Mga Magtotoo, Mga Nagapatoos, ug Mga Dili-Magtotoo*. Silang tulo nga grupo, kamo—aduna kamo niana bisan asa. Tulo kini diha sa grupo, usab; makita kini nga kahimtang sa mga tawo sa una pa. Mahimong balikan nato ang kaniadto pa ug mapamatud-an, nga ingon na niana nga kahimtang ang mga tawo sa una pa. Dugay na silang kanunay sa ingon niana nga matang sa kahimtang.

⁸⁹ Dayon ang makita nga ingon na niana kini, nan nagapaaghat kini kanato sa pagtoo nga gidisenyo sa Dios ang mga tawo nga maingon niana. Aba, mapahimo Niya ang Iyang kaaway nga dayegon Siya. Ang tanan... Si Pablo, sa pagsulat, diha sa Mga Taga-Roma, sa ika-8 nga kapitulo, miingon, “Oy, buangbuang nga tawo. Mahimo ba—mahimo bang ingnon sa lapok ang magkokolon, nganong gihimo Mo man ako... nga ingon niini? Wala ba diay Siya ing kagahum sa pagbuhat ug usa ka sudlanan alang ngadto sa kadungganan ug ang usa ngadto sa kaulawan?” Unsa kaha kung wala Siya'y gibuhat nga gabii? Dili mo gayud mapasalamatan ang dan-ag sa adlaw. Kung dan-ag lang kini tanan sa adlaw, dili mo mahibaloan kung unsaon pagpasalamat niini. Unsa kaha kung wala'y balatian? Dili mo gayud mahibaloan kung unsaon pagpasalamat tungod sa maayong panglawas. Unsa kaha kung wala nagkaaduna og daotan nga mga tawo? Walay daotan nga mga babaye? Dili mapasidunggan ang usa ka maayong babaye. Kita n'yo? Dili nila... Dili mapaingon kaniya ang pagpasidungog, tungod kay ingon niana man kini tanan, usa ra kini ka pare-parehong butang. Apan ang tanan niini tungod sa balaod sa pagkalahi.

⁹⁰ Ginabuhat kini sa Dios nga ingon niana: ang usa alang ngadto sa kaulawan, aron maipakita ang laing usa nga madungganon; ang usa nga pagkasayup kaayo, ginapakita niini... Kung dili pa ingon niini, mamahimong mao na kana ang hustong butang. Kung wala man... Dili mahimong magkaadunay mini nga dolyar gawas kung wala sá og usa ka tinuod nga dolyar. Ug dayon ang maong mini maoy... Kung nahimo lang kini nga mini sa pagsugod pa lang, kung ingon-ana mahimo nga kini ang maong tinuod. Apan kini—usa ra kini ka kinopya. Dili mahimong magkaadunay... Dili mahimong magkaaduna og kasal-anan gawas nga adunay pagkamatarung. Tungod kay ang pagkamatarung mao ang—mao ang hustong butang, ug ang kasal-anan maoy pagtuis sa pagkamatarung. Sa ubang pinulongan, ang kamatuoran mao'y usa ka kamatuoran. Dili mahimong bakak ang usa ka bakak gawas kung aduna usá og usa ka kamatuoran; aron tuison kana nga kamatuoran ngadto

sa usa ka bakak. Busa ang tanang kasal-anan wala na'y lain kondili pagkamatarung nga tinuis. Busa, kana ang sistema sa kalibutan.

⁹¹ Duha ka mga sistema; ug ang usa niini mao ang *tarung* nga sistema, ug ang usa usab mao ang usa ka *tinuis* nga sistema. Ug ang usa niini mao ang Pulong sa Dios, nga mao ang tarung; ug ang matag pulong sa tawo mao'y bakak. Ug kining pang-denominasyon nga sistema nga aduna kita karon, nga nagaporma na ngadto sa World Council of Churches sa paghimo og marka sa mapintas nga mananap aron ipatungha silang magkausa na, mao ang sayup nga butang. Ug buta nga nagalakaw ang mga tawo pasulod niini.

⁹² Human nang gipahimutang sa Dios sa kalibutan ang butang nga maoy moluwas kanila. Apan sa hunahuna nila nga usa ka pundok kini sa panatismo. Ayaw nila niini. Ginasalikway nila kini. Ang hunahuna nila nga kinahanglan aduna sila'y buhaton bahin niini. Kinahanglan nga mobuhat sila og kaugalingon nilang sistema. Aduna na'y sistema ang Dios dinhi, ang Iyang Pulong. Apan ayaw nato Niana. Busa mahikaplagan nato ang atong mga kaugalingon karon, nga sama gayud kung unsa sila kaniadto.

⁹³ Ug karon, sa pagkakita nga ang mga tawo nadisenyong mamaingon niana . . . Himatikdi, ingnon mo . . . Kahibalo ko nga nanginahanglan ako og taastaas nga oras, apan ayaw kong tutukan kana tungod kay nagapabalaka kini kanako. Kita n'yo?

⁹⁴ Sa pulitika; karon kuhaon nato sama sa . . . Ipananglit lang nato . . . aron makita kung ang mga tawo ba'y nadisenyo ngadto sa tulo—tulo ka klase. Ipananglit nato ang pulitika. Adunay uban nga mainiton ang pagsuporta alang sa usa ka tawo. Ug adunay usa pa ka grupo nga gikalagotan siya. Ug aduna usab laing grupo nga wala mahibalo kung unsa ang buhaton bahin kaniya; wala sila kahibalo kung hain man, ug nagapalibog kini kanila.

⁹⁵ Ang ingon *niining* tawo, “Oh, maayo kaayo siya nga tawo. Siya—siya ang mamahimong pinakamaayo nga Presidente nato.”

Ang ingon sa *usa pa*, “Siya walay uban pa kondili usa ka magsusupak.”

⁹⁶ Dayon ingon sa mga *anaa sa tunga*, “Karon wala ko kahibalo kung unsay buhaton.” Kita n'yo? Kita n'yo, nadisenyo kitang ingon niana. Gihimo kitang ingon niana. Ingon niana kung unsa ang tawo. Kinahanglan nga mamaingon niana aron matuman ang dakung plano sa Dios. Ug aron nga matuman ang Iyang katuyoan nga Iyang pagatumanon ibabaw sa yuta, kinahanglan nga maidisenyong ingon niana ang tawo. Ang usa *husto*. Ang usa usab *sayup*. Ug ang lain pang usa *anaa sa tungatunga* sa maong duha. Ingon na niana kini sa una pa.

97 Timan-i, ginabuhat nila kana pag-wala sila kahibalo... Ang maong tawo nga anaa sa tungatunga, dili-maayo kini nga puwesto tungod kay: mahimong ipakita sa usa ang butang, kon ngano nga nagadahum siyang husto siya; mapakita sa usa usab kung unsa nga sa hunahuna niyang sayup siya; ug ang usa sa tungatunga walay hibangkaagan bahin sa maong butang, wala siya kahibalo kung asa siya modapig. Ug ingon niana gayud kini diha sa relihiyon. Mao ra gihapon ang ginabuhat sa mga tawo karon bahin sa ilang pang-Walay Katapusang padulngan.

98 Karon makapasakit gyud kita, sa makadiyut lang. Ginabuhat nila kini sa ilang pang-Walay Katapusang padulngan. Moanhi ang usa ka tawo dinhi sa niining—sa niining...aron mokaon. Ug kung may makita kang damang sa imo mismong yahong nga sinabawan, gustohon mo nang idemanda kana nga kumpanya o kana nga restawran. Aba, dili mo gayud kaonon kana nga sinabawan, makapahilo kini. Imo—imo—imo—ayaw mo na gayud niini, usa ka dakung uk-uk o unsa man ang nalat-an na dinha sa usa ka yahong nga sinabwan. Aba, ayaw mong magkaaduna niini man lang. Magkasukaon ka sa paghunahuna niini. Apan bisan pa man, tugotan mo ang usa ka pundok sa mga teologo nga ipatulon kanimo ang kung unsa man nga maoy magpahilayo kanimo sa minilyon ka milya gikan sa Dios, ug tunlon kini. Sa dihang, “Ang tawo mabuhi pinaagi sa matag Pulong nga nagagula sa baba sa Dios.” Usa kini ka kadena kon diin nakasab-it ang imong kalag ibabaw sa impyerno. Ug sama sa gikaingon ko na sa una, “Ang kadena anaa sa pinakakusgan niini diha sa iyahang pinakahuyang nga bahin.” Usa ka sumpay ang maputol...kana lang ang kinahanglan mong buhaton ang pagputol sa usa niini; kana lang. Ang tanan nang uban pa niini mangluag na tungod niini. Ingon lang niini ka kusgan kini sama sa pinakahuyang nga sumpay niini.

99 Karon...Ug ang usa ka tawo nga nahibalo nga kung kaonon mo kana nga sinabawan nga nakasagol niini ang makahihilo nga damang, siguradong magkasakit ka niini. Kinahanglan mong magpa-hospital, ug—ug igaduotduot ang imong tiyan ug daghan pang pagpalisod-lisod ang maagihan. Ug sa tinuod mahimo kang patyon niini. Apan, sus! Ikaw...Aba, dili ka na gayud moanha pa sa usa ka lugar nga sama niana. Dili mo na gayud kini adtoan pa pag-usab, tungod kay ikaw—ikaw—nahadlok ka nga mahiloan ka ug mamatay. Ug dayon sa walay pagduhaduha mopamiyembro ka pa, ipalista pa ang imong ngalan sa mga libro, ug makig-away alang sa mismong maong hinungdan sa butang nga nag-ingon ang Biblia, “Wala niini ginadaot ang imong lawas, apan ginahatud ang inyong kalag ngadto sa impyerno.” Kita n’yo? Makapahibulong ang ginabuhat sa mga tawo. Sila—sila’y...Ilang ginatan-aw ang ilang padulngan sa Walay Katapusan, nga ginabasi kini diha sa kung unsang pang-

teolohiyang pinulongan. Ug mahimong dalhon mo kanila ang Kasulatan, moingon, “Ingon niini ang gisulti sa Biblia. Ania kini mismo dinhi.”

¹⁰⁰ Ug tan-awon lang Kini sa maong teologo, “Bueno, alang man kana sa laing panahon.” Kita n’yo? Ug maminaw na kamo kaniya. Makita mo kung unsay ginaingon sa Dios. Ang usa ka tinuod, matuod nga Cristohanon nagapaminaw lamang ngadto niana nga Pulong, ug kana lang. Ang tawo sa Dios mabuhi pinaagi niana nga Tinapay.

¹⁰¹ Himatikdi, ang uban—uban nagatoo sa Pulong. Samtang adunay uban nga motoo sa ilang pang-denominasyon nga interpretasyon. Ug aduna usab uban, tungod niining mga kalibog, nga dili na mahibalo kung unsay toohan.

¹⁰² Karon *ang uban* kanila miingon, “Oy, kining World Council of Churches, mamahimong mao na ang tinuod. Pagahiusahon kitang tanan niini. Oh, mao na gyud kini.”

¹⁰³ Ug *ang uban* moingon, “Aba, iya kini sa Yawa! Anaa na kini sa Kasulatan.”

¹⁰⁴ Dayon ang *tawo nga wala nagahatag og panahon* sa pagpamalandong ug mag-ampo ug susihon kini, ingon niya, “Oh, kalimti na.” Uh-huh. Kalimti na? Imo kining. . . tungod sa imong pagpahayag, igsoon, sa imong posisyon, sa pinulongan nga imong ginadawat, mao ang mohatud kanimo ngadto sa imong padulngan sa Walay Katapusan kon diin didto ka na sa dayon. Ayaw buhata kana.

¹⁰⁵ Ang angay kanato mao ang pagpamalandong sa dihang adunay motungha og unsa mang butang nga sama niini. Ug usa ka pangutana, sama sa mga adlaw kaniadto ni Jesus; sa miadto sila, ang giingon sa iglesia, “Oh, usa ra na Siya ka magsusupak. Wala ka’y makuha Kaniya.”

¹⁰⁶ Apan miingon Siya, “Susiha ninyo ang mga Kasulatan.” Miingon Siya, “Diha Kanila nagahunahuna kamo nga aduna kamo’y Kinabuhi nga Walay Katapusan, ug Sila ang magasulti kaninyo kung Kinsa Ako.”

¹⁰⁷ Dayon ang mga kalalaken-an, mga kababayen-an, nga aduna man lang og pagka-Cristohanon, o may kaikag man sa ilang padulngan sa Walay Katapusan, angay lang nga mosusi sa Kasulatan ug tan-awon kung Kinsa gayud Siya. Dayon ang pangutana dili na unta nga, “Kinsa man kini?” Ingon na nila, “Ania na Siya!” Mao kana ang pagkalahi. Kita n’yo, tungod nga tawo, sila—sila—malagmit lang gayud sila nga mamaingon niana. Ang uban gikatakda nang daan ngadto niini. Mabug-at nga isulti kana, apan tinuod kana. Ginapakita niini kini. Kita n’yo?

108 Karon, sa karong panahon, *ang uban* moingon, “Nagatoo ako sa Pulong. Ang Pulong mao ang Kamatuoran; ang matag Pulong Niini.”

109 Moingon *ang uban*, “Ah, ginaadtoan sa among mga pastor ug ginatun-an ang ingon nianang matang sa . . . Nahibalo na sila kung unsay isulti mahitungod Niana.”

110 *Adunay usa pa* nga miingon, “Bueno, wala ko kahibalo. Bag-o lang ko nakapamiyembro *niining* usa. Wala ko hinggustohi kini. Mianhi ako dinhi ug nagpamiyembro *niining* usa. Ako—wala na ko kahibalo kung haing usa ang akong pamiyembrohan.” Kita n’yo? Ingon na niana kini kaniadto pa, pareho ra nga matang sa mga tawo. Bueno ingon na niana kini sa una pa, sa sugod pa lang, ug mamaingon niana kini sa kanunay.

111 Karon atong pamalandungan ang Kamatuoran sa Biblia mahitungod niing butanga, ug tan-awon kung husto ba Kini; sa makadiyut lang karon . . . si Adan . . . Didto sa kinasugdanan nagsugod kini nga ingon niini, sa paagi nga aduna kita mismo karon, wala ni gamay nga pagkausab. Usa ka “magtotoo” niadto si *Adan*. Si Satanas ang “dili-magtotoo”; wala siya mitoo sa Pulong. Busa nalimbongan niya si *Eva*, nga “dili sigurado” kung husto ba Kadto o dili. Kita n’yo? Si Satanas, nga dili-magtotoo . . . Nag-ingon ang Dios, “Sa adlaw nga mokaon kamo dinha, mamatay kamo niana nga adlaw.”

112 Miingon si Satanas, “Dili kana husto.” Kita n’yo, ug wala siya mitoo Niini. Si Adan mitoo gayud Niini. Busa milihok siya diha sa maong usa nga anaa sa tungatunga. Dili gayud nila maila . . . dili gayud maila sa maong babaye.

113 Karon, himatikdi, ang babaye dinhi nagahulagway sa umalabot nga iglesiang denominasyon nga gitawag og pangasaw-onon. Nagagikan kini tanan sa Genesis. Usa kini ka binhi. Pag-sugdan mo diha sa Genesis; dire-diretso mong makuha ang imong hulagway. Kita n’yo? Karon, dinhi, ginahulagway niya ang iglesia niining panahon tungod kay ang uban nagaingon (ipananglit nato karon ang mga Presbyterian, ug mga Lutheran, ug tanan na sila nga nanungha, kining mga magpapatigayon ug uban pa), “Gusto namong magkaaduna og . . . Gusto namo ang bautismo sa Balaang Espiritu. Kami—gusto namong maangkon Kini.”

114 Naamgo ba ninyo ang adlaw nga mahimong gikahimutangan nato? Kita n’yo? Mahimo nga wala gayud nila Kini masabtan. Kahibalo ba mo nga giingon ni Jesus, “Sa dihang sila, ang nangatulog nga mga ulay . . .”?

115 Karon, hinumdumi, nanag-abot ang mga nangatulog nga mga ulay aron mohangyo og lana. Bug-os na kadtong naselyuhan. Wala niya Kini makuha. Wala gayud niya makuha Kini. Napamalandongan ba ninyo nga human nga wala na

ang Pangasaw-onon, nga gisakgaw na ngadto sa Langit, magapadayon ra gihapon ang mga kaiglesiahan, mangdahum ang mga tawo nga luwas sila ug tanan na nga sama sa ilang gihimo sa una pa. Padayon lang gihapon maingon kaniadto sa mga adlaw ni Noe. Padayon sila mismo nga nanagpangaon, nanag-inum, ug tanan na nga sama gayud sa ilang gipanghimo sa una pa. Wala sila kahibalo niini, apan gisirado na ang pultahan. Ug mahimong mahitabo, mga higala, nga mahimong isarado na ang pultahan sa unsa mang oras. Tingali human na, sa pagkahibalo nato. Wala ta kahibalo.

¹¹⁶ Pipila ra kanila ang makasulod. Nasayod kita nga “Maingon sa nahitabo kaniadto sa mga adlaw ni Noe (walo ra ka kalag ang naluwas), maingon man usab kini sa pag-abot sa Anak sa tawo.” Adunay pipila ra ka kalag ang maluwas. Wala ko nagaingon nga walo ra. Mamahimong walo ka gatus o . . . Ako—wala ko kahibalo kung pila kabuok gayud. Walo ka libo . . . Ako—wala ko kahibalo. Walo ka milyon . . . Akong . . .

¹¹⁷ Apan nakita n’yo, dili lang molangkob ang Pangasaw-onon sa kung unsa nga diyutay’ng pundok ang ania karon dinhi sa yuta. Diha sa ikapitong pagtukaw, sa pag-abot Niya, nanagpamangon kadto nga mga ulay ug gihikay ang ilang mga lamparahan. Ang tanan nga sa kaniadto pa, ang matag usa nga nanagpanoo sa dinihogang Pulong sa tanang kapanahonan, managpamangon. Sama sa piramide (sa pinakaubos nga bahin), ug pataas . . . Apan gikinahanglan nga moabot ang Pangulong-Bato aron nga pundukon ang maong tibuk butang sa paghimo niini ngadto sa usa—usa ka piramide. Kita n’yo, pormahon kini tanan. Karon, ang Pangasaw-onon linangkuban sa kadtong mga gikan sa tanang kapanahonan, nga nanagpanoo ug nga nanagdawat kang Cristo ingon nga ilang Manluluwas.

¹¹⁸ Karon, dili sigurado kaniadto si Eva. Giingnan siya ni Adan, miingon, “Karon, nag-ingon ang Dios, Langga, nga, ‘Sa adlaw nga mokaon ka niini, kana nga adlaw ka mamatay.’”

¹¹⁹ Apan miingon sila . . . miingon si Satanas, “Sigurado man nga dili mamahimong husto kana. Mahunahuna mo ba ang usa—usa ka Amahan nga anaon Niya ang Iyang mga anak . . . Gamay ra nga pagduladula, butang lang nga sama niana. Sigurado man nga dili ingon niana Kini.” Kita n’yo?

¹²⁰ Ug unsay gidapigan sa maong babaye sa kaulahian? Midapig siya ngadto sa maong “sigurado man.” Ug eksaktong ingon niana gayud kung unsa ang ginahimo sa iglesia sa karon. “Oh, *sigurado man* . . . Usa kami ka bantugan nga iglesia. Inila kami nga mga tawo. Dugay nang panahon kami nga . . . Ang tanan niining butang nga ang tawag nila dinhi panatisismo, kining—kinig butang nga ginatawag nilang bautismo sa Balaang Espiritu ug tanan na, wala kana’y pulos! Kita n’yo, nga . . . Walay butang nga ingon-ana. Ah, *sigurado man* . . . Nagahatag man ko sa akong

ikapulo. Nagasimba man ako. Ang mama ko mitambong man sa... *Sigurado man* nga ang Dios...” Apan, lahi ang giingon sa Dios, ug mamahimong ingon niana gayud kini, subay lang gayud sa kagustuhan sa Iyang Pulong. Giingon na Niya kung mamaunsa kining kapanahonan sa iglesiang Laodicea. Aduna ko’y espesyal nga libro nga papagawas na, mahitungod niini, hapit na gyud kaayo, kon itugot sa Ginoo, kita n’yo, mahitungod niining Laodicea, aron ipakita nga tapos na kini, nga siya’y selyado na didto sa sulod, ug nga anaa si Cristo sa gawas. Wala gayud giingon nga Siya misulod balik, kahibalo na mo. Busa atong makaplagan sa karon, ang pagpahigawas sa Pulong, sama sa ingon na niini sa una pa.

¹²¹ Karon, himatikdi, si Moises, ang dinihogan nga Pulong... o tawgon man nato siya... Nagalaum ako nga masabtan ninyo, sa dihang moingon ako nga siya niadto ang Mesiyas. Siya niadto ang dinihogan nga Pulong nga gikasaad alang niadtong adlaw. Ingon ana si Moises kaniadto! Nagatoo ba kamo niana? Sigurado, ang pulong—ang pulong nga *Mesiyas* nagakahulogan “ang dinihogan.” Kita n’yo? Karon, si Noe ang *mao’y dinihogan* sa iyang adlaw. Gisulti na niadto ni Abraham nga magkaadunay... Ang iyang kaliwatan mamahimong dumuloong sulod sa upat ka gatus ka tuig diha sa pagkaulipon, ug nga ipahigawas sila pinaagi sa usa ka gamhanang kamot, ug kung unsa ang igapakita niya: mga ilhanan niya ug mga katingalahan... ug—ug ang maong mga kaliwatan nga magaabot, ug kung unsay pagabuhaton. Ug nagtindog didto si Moises, ang kadtong *dinihogan nga Pulong* alang niadtong adlaw. Mao kana kon ngano nga mahimo niyang ibutang ang iyang kamot sa iyang dughan. Ngano man? Nagtindog siya didto sa Presensiya sa Dios. Amen! Nakapalibot kaniya ang gamhanan nga Kahimayaang Shekinah. Ang matag lihok nga gibuhat niya girepresentar ang Dios. Dinha kon diin unta nagabarug ang iglesia sa karon. Husto! Imbis dinha, atua kita sa halayo sa usa ka pagkahinayak mahitungod sa kung unsang butang nga pangdenominasyon.

¹²² Apan nakamatikud si Moises, ug miadto siya nga nag-inusara. Ug atua kadtong Haligi nga Kalayo sa taliwala didto niadtong sapinit. Ug ania nagtindog si Moises nga dinihogan. Walay duda nga wala gani nakahibalo ang maong tawo kung unsay iyang ginabuhat. Ang mga simbolo nga gihatag kaniya niadto sa dihang mitindog siya didto nga dala ang pang-bantay sa carnero niya nga sungkod, ug nasayod nga usa gayud kadto ka sungkod sa kamingawan. Nahimo kini nga usa ka bitin, dayon nahimong usa ka panghimayad; ingon niadto ang gibuhat sa bitin, didto sa kamingawan. Ang tanang butang nga iyang gibuhat... Mga ilhanan kadto ug mga tingog nga nagasulti niadto sa katawhan. Kita n’yo, may butang nga nakakonekta kaniya. Ug wala gani siguro nahibaloan ni Moises mismo, apan

siya niadto ang dinihogan nga Pulong alang niadtong adlaw. Siya ang maong dinihogan nga Mensahero. Busa kung siya niadto ang Mensahero alang niadtong taknaa, siya gayud ang maong Mensahero alang niana nga takna. Siya niadto ang *maong dinihogan*.

Karon, siya, si Josue, ug si Caleb, mao niadto ang mga magtotoo sa maong grupo (himatikdi) ug naningkamot nga itudlo sa uban ang Kamatuoran. Apan nakita n'yo, si Satanas (si Dathan ug si Korah) nahimong hinungdan nga nangamatay ang uban didto sa kamingawan. Karon, unsa man ang problema niadto?

¹²³ Gitawag sa Dios si Moises. Ayaw pa niyang moadto. Kadtong mga propeta adunay ingon-anang mga butang nga pagabuhaton hangtud nga sila—sila'y... Malisud kadto nga butang aron buhaton. Dili nila gusto ang pagpangadto didto, ug nga mabugalbugalan. Ang gusto nila nga magkaadunay pagpakigkauban ug makigtambayayong sa tanan nang uban pa kanila ug—ug makig-uban sa maong mga kaissoonang lalaki. Apan nakita n'yo, sama lang... nagtoo ko... Nalimtan ko kung kinsa nga propeta kadto, ang nag-ingon, “Kung... Dili ko gustong buhaton kini,” (sa laing pinulongan) “apan magasilaob ang tibuok kong kasingkasing. Nagsulti na ang Dios ug gikinahanglan kong ihatud Kini.” Magustohan man nila Kini; kung ilansang man nila siya; kung pagabatohon man nila siya; unsa ma'y ilang buhaton... Nagsulti na ang Dios sa iyang kasingkasing, ug kinahanglan niyang isulti Kini. Dili aron nga magpalahi-lahi, kondili ang magmasinugtanon. “Ang pagsugot labi pang maayo kay sa halad; ang pagpamati, kay sa tambok sa mga lakeng carnero.” Kita n'yo, atua Kini sa iyang kasingkasing. Kinahanglan niyang buhaton kini. Mao Kadto ang iyang Kinabuhi. Dili niya Kadto mapugngan. Adunay butang, usa ka pagpitik, nga nag-aghat kanila. Dili nila mahimong panalanginan Kini o itunglo Kini. Aduna ang Dios og ingon ka bug-os nga pagkontrola kanila hangtud nga Siya—Siya na ang ilang tingog, ang ilang lihoc. Alleluya!

¹²⁴ Hatagi ko og usa ka Iglesia nga tuman ka dinihogan sa Dios hangtud nga ang matag pagpamuhat og lihoc nila mao'y MAO KINI ANG GINAINGON SA GINOO, nga nagalakaw diha sa Kahimayaang Shekinah, igapakita ko kaninyo ang usa ka Mesiyas (ang maong dinihogan sa Dios) nga ania ibabaw sa yuta.

¹²⁵ Atua nagtindog si Moises tupad niining nagadilaab nga sapinit ug sa Kahimayaang Shekinah. Nagtindog didto, dinihogan, nga halos wala siya kahibalo kung unsay iyang ginabuhat. Ginasunod niya lang kung unsa ang giingon kaniya sa Tingog nga buhaton, “Ipasulod ang imong kamot diha sa imong dughan. Ipagawas kini. Punita kana nga sungkod. Himoa kini nga usa ka bitin. Ibalibag kini didto pag-usab.” Bisan unsa pa'y giingon ni kinsa pa man, gibuhat niya kini.

¹²⁶ Miingon, “Ginoo, ipakita kanako ang Imong Himaya, ug andam na ako sa pag-adto sa Egipto. Dili ako usa ka tawong larino manulti. Dili ako maayong manulti. Apan ipakita lang kanako ang Imong Himaya.” Ug Iya Kadtong gipakita kaniya. Ug miadto siya didto ug gidala kining mao gihapong mga butang, ug aron ipakita nga siya niadto ang dinihogan nga Mesiyas. Nagpunit kanang tawhana og abog gikan sa yuta ug giitsa kini sa hangin, ug nanglupad ang mga langaw ug mga pulgas gikan niadtong abog, ug nanagtapon sa yuta. Unsa man ang makalalang, gawas sa Dios? Nagkuha og tubig gikan sa suba ug gibubo kini didto sa tampi; ug ang kada tulo sa tubig sa tibuk Egipto, nangahimong dugo. Unsa ma’y makabuhat niana, gawas sa Dios? Unsa man kadto? Bug-os gayud siya nga nakatugyan ngadto sa dinihogan nga Pulong sa Dios hangtud nga siya mao na ang Mesiyas.

¹²⁷ Gipaninguhaan nga isalikway Kadto sa mga Egiptohanon sa niining paagi. . . Gipaninguhaan nga isalikway Kini sa mga dili-magtotoo. Naniuha ang mga nagpatootoo diha sa ilang mga lingla. Apan ang Pulong sa Dios ang naghatud kanila mismo diretso ngadto sa Yutang Saad. Husto kana. Dinihogan sila. Sila’y . . . Siya niadto ang maong Mesiyas.

¹²⁸ Karon mitungha ang pagduhaduha didto sa kamingawan. Ania kon diin kini ginadala. . . Kita n’yo, karon, gusto kong bantayan ninyo, mga kaigsoonan ko. Karon hinumdumi, natagamtaman sa niining katawhan kadto nga mga panalangin. Nalipay sila sa wali niining propetaha, niining maong dinihogan. Nanagtoo sila kaniya. Nanagsunod sila kaniya. Apan adunay mitindog didto sa kamingawan, usa nga ginganlan og—og Dathan, ug usa nga ginganlan og Korah. Ug nanag-ingon sila, “Usa na gayud kini ka pang-usa ra ka tawo nga buluhaton. Abi ni Moises nga siya ra ang bugtong tawong tinawag sa Dios.”

¹²⁹ Ang kanang Mensahe nga pinaagi lamang sa usa ra ka tawo, ayaw nila Niini. Dili, ayaw nila Niini. Ug wala gayud ang Dios nakigpatigayon kondili pinaagi ra sa usa ka tawo sa matag panahon. Usa kini ka Mensahe nga pinaagi lamang sa usa ra ka tawo sa una pa. Kanus-a ba Siya nakigpatigayon sa mga tawo sukad-sukad, gawas nga pinaagi ra sa usa ka tawo? Usa kini ka tawo. Dili kini nga usa ka grupo. Ikaw ang may tulubagon sa Dios, ang matag usa kaninyo. Moingon ka, “Oh, nagatoo man ako Niini.” Imo lang. . . Ang ginahimo mo, imo lang ginahangup Kini. Ginahangup mo ang usa ka panghunahuna.

¹³⁰ Ania ang usa ka babaye nga nagatindog dinhi. Usa usab ako ka batan-ong lalaki, nagapaabot nga maminyo. Natagbo niya sa tanang paagi ang akong ginapangita sa usa ka babaye. Usa siya ka hiligugmaon nga Cristohanon: ingon niana siya kon tanawon, medyo ingon niana siya kung mamisti, ingon niana siya kung manglihok, ingon niana siya sa pagkinabuhi. Angkonon ko nga mamahimo siyang usa ka maayong asawa para kanako.

Apan siya'y dili pa maako gawas kung kuhaon ko siya alang kanako.

Ingon niana kung unsa ang Mensahe. Mahimo mo nga makig-uyon-uyon Niini ug moingon, "Husto Kini." Pero gikinahanglan mong dawaton Kini sa imong kaugalingon aron nga mamahimong kabahin Niini. Dayon ikaw ug ang Mensahe nahimo nang usa. Dayon anaa na kanimo ang pagdihog, maingon man nga anaa kini sa uban.

¹³¹ Karon, si Satanas, wala siya mitoo Niini. Si Dathan... Nadani niya si Dathan ug sila nga dili motoo Niini, nga nahimong hinungdan nga mangamatay silang tanan.

Pero moingon ka, "Sa makadiyut lang, Igsoong Branham, nag-ingon ka nga, "Tulo: si Moises, Si Josue, ug si Caleb." Husto gayud kana. Mao kana kung unsa ang atua didto. "Apan dinhi nagaingon ka lang nga, 'Duha.' Nagaingon ka dinhi nga 'Adunay...'"

¹³² Moingon mo, "Kadtong supernatural nga si Satanas." Apan adunay supernatural nga Dios, usab, nga nagadihog niining tulo. Karon, ang dinihogan lang ni Satanas. Apan adunay usa pa nga nagaabot, nagaabot ang usa pa, bantayi n'yo lang sa pipila ka minuto. Nagaabot siya diha sa esena, Balaam ang iyang ngalan. Usa siya ka propetang mahigugmaon sa kuwarta; gipasibantog nga propeta, mini nga propeta.

¹³³ Sa kanunay adunay tanan na nga matang sa mga propeta. Ug kanunay sa Israel ug mao usab sa maong grupo, aduna kanunay og mga propeta; silang: madramahon nga mang-ulog-ulog, magsige papapel nga mga propeta, ug mag-uyon-uyon ug nga ang dayeg sa hari mao'y tinguha, ug adunay kamot nga andam motabang, ug, sige-sige lang, nga sama kang Ahab nga aduna siya'y upat ka gatus kanila, nga nakabisti gayud diha sa ilang pamisti nga pangsimbahan. Ug gisultihan niya kamo... gisultihan niya ang—ang—ang halangdong hari didto, si Josaphat, miingon, "Aba, oo, aduna ko'y upat ka gatus, ang tanan niini binansay og maayo, Hebreohanong mga propeta."

¹³⁴ Ug nanag-abot silang tanan ug nanagpropesiya. Apan ang kadtong tawhana adunay igong Dios diha kaniya aron maila nga sayup kadto, tungod kay nasayod siya nga gitunglo na ni Elias kadto nga butang. Ug unsaon man pagpanalangin sa Dios sa kung unsay Iya nang gitunglo? Dili Niya mahimong buhaton kini. Ingon niya, "Aduna ka ba'y usa pa nga mahimo natong pangutan-an?"

¹³⁵ Miingon siya, "Oo, aduna pa'y usa dinhi; si Micheas, ang anak ni Imla. Apan," miingon, "nagadumot ako kaniya." Miingon, "Moanhi siya kanamo sa masubsob nga ginasaway ako ug ginasultihan ako og tanan nang daotan." Unsaon man... Mingulob na ang liyon. Nagsulti na ang Dios. Kinsa man ang dili makahimo sa pagsulti sa Kamatuoran? Sa dihang supak kadto sa

Pulong sa Dios, kinahanglan niyang itunglo ang maong butang. Kanunay na silang nagkaaduna niini, ang mini nga propeta. Apan kanunay silang nagkaaduna og matuod, usab. Timani, wala nagkaaduna og usa ka tibuok nga eskwelahan kanila. Nagkaaduna niadto og usa ra kanila. Ug ingon na niana kini sa unsa mang panahon. Ingon niana kini, sa karong panahon.

¹³⁶ Ang Propeta sa maong adlaw mao kining Pulong. Husto kana. Ang Propeta, sa karong panahon, dili ang tanan niining nagkalahilahi dinhi. . . Nga adunay usa ka propetang Methodist, usa ka propetang Baptist, usa ka propetang Pentecostal, tanan na nga matang sa mga propeta sa palibot, sa tibuok nasud. Apan sa gihapon nagapabilin: nga adunay Usa ra ka Matuod nga Propeta, ang mao sa gihapon kagahapon, karon, ug hangtud sa kahangturan. Husto kana. Si Jesus Cristo! Ug Siya ang Pulong. Husto kana. Siya ang Pulong: ang Dinihogan nga Pulong sa maong takna.

¹³⁷ Himatikdi Siya karon, samtang magpadayon kita. Makita nato nga si Josue ug si Caleb. . . Ug dayon ania na nagaabot ang sinuholan nga propeta nga si Balaam. Unsa ma'y iyang gibuhat? Wala niya mismo panumbalinga ang matag Pulong sa Dios, human nga gipakita na kini kaniya sa Dios. Siya ang nagarepresentar sa denominasyon, sa karon. Atong ipakita kana sa pipila ka minuto; si Dathan, kung unsa siya, ug kung unsa ang uban pa kanila kaniadto. Karon girepresentar ni Balaam ang denominasyon. Ang usa ka tawo nga dili angay unta. . . nga mas nahibalo pa unta. Kahibalo siya nga sayup kadto. Apan unsa man ang iyang gibuhat human niadto? Nagpasidaan na ang Dios kaniya, ug sa gihapon wala niya panumbalinga kana nga pagpasidaan. Nabuang na siya kaayo sa kuwarta ug sa pagkainila aron mamahimo siyang kapareho kanila. Ug mao man usab ang ginahimo sa mga kaiglesiahan karon, nga diretsong paingon na nianang World Council of Churches. Ug ang matag pasidaan ginapalanog na sa tibuok nasud, ug ang mga ilhanan ug mga katingalahan niining kaulahiing mga adlaw. Wala nila kini ginapanumbaling bisan unsaon pa, tungod kay mas higugmaon pa nila ang dayeg sa tawo nga labaw pa kay sa paghigugma nila sa Pulong sa Dios.

¹³⁸ Aduna ko'y maayong higala nga atua didto, nga nagawali nianang mensahe; usa ka Pentecostal, nagasulti didto sa mga tawo, sa pagpaningkamot nga hiusahon ang tanan nga mga iglesia. Nagaingon nga "kinahanglan nga manggiapil kita niini, niining ekumenikal nga kalihokan." Aba, ang uban na kanila. . . ang church of Christ. Daghan sa niining mga denominasyon ang wala gani nagatoo sa ulay'ng pagkahimugso, ug tanan na niining nagkalainlaing mga butang, ug silang tanan mamahisakup niana. Unsaon man pagkakakuyog sa duruha gawas kon sila magakauyon? Dayon, miingon ka og "Amen" niana, ginahunahuna ko ang mahitungod niini karon: Kung

ingon-ana unsaon man pag-ingon sa usa ka tawo nga usa siya ka Cristohanon ug nga puno sa Balaang Espiritu, ug ipanghimakak nga kana nga Pulong mao sa gihapon kagahapon, karon, ug hangtud sa kahangturan? Ang Balaang Espiritu nga anaa kanimo pagapuntohan kana nga Pulong, ang matag Pulong og, “Amen. Amen. Amen.” Sa dihang aduna ma’y ginaingon ang Pulong, moingon ka og, “Kamatuoran Kana.” Amen! Ang. . . tungod kay miuyon ka sa Pulong. Miuyon ka sa Dios. Ikaw ug ang Dios usa ra. Anaa kanimo ang Dios. Ikaw ang Iyang anak nga lalaki o ang Iyang anak nga babaye, ginahimo kang usa ka mesiyas alang Kaniya, ang dinihogang Pulong nga nagpuyo diha kanimo.

¹³⁹ Himatikdi, kining mga butanga wala panumbalinga ni Balaam. Usa siya niadto ka hingpit nga denominasyon ug usa ka tukmang tubag sa ilang kagustuhan. Mao kadto ang gusto ni Dathan. Mao kadto ang gusto ni Korah. Gusto nilang motukod og usa ka organisasyon gikan niini. Miingon, “Aduna kita’y balaang mga tawo sa tibuok palibot dinhi.”

¹⁴⁰ Dili ko igsapayan kung unsa pa ka hingpit magkinuyogay ang duha ka tawo, aduna gayu’y pagkalahi tali kanila. Dili pareho ang atong mga ilong. Ang mga tamla sa atong kumagko dili magkapareho. Adunay daghang mga butang bahin kanato. . . . Apan bisan pa niana makaabuno kita og dugo alang sa usa’g usa, bisan tali sa duha ka kaluha, ug magkalahi sila sa gihapon. Kung ingon-ana, makita n’yo, napahimutang sa Dios ang usa ka tawo ngadto nianang kahimtanga, ug ang usa usab nagatoo niana.

¹⁴¹ Nagbuhat Siya og usa ka tawo, ug daghan nang mga tawo gikan niana nga tawo. Maingon nga ang tanan nangamatay kay Adan, ang tanan nangabuhi diha kang Cristo. Naghimo Siya og usa ka dalan sa kamatayon, ug nanaglakaw silang tanan pasulod niini. Ug naghimo Siya’g usa ka dalan sa Kinabuhi, ug ang tanan nga nagalakaw dinha adunay Kinabuhi. Gikan sa maong usa ka Tawo, dili nga usa ka dosenang tawo ang miabot aron magpakamatay. Dili kinahanglan nga usa ka dosena ka tawo ang makasala. Usa ka tawo ang nakahimo og usa ka sala. Usa ka Tawo ang nagbayad sa maong hingpit nga silot. Wala na kini nagkinahanglan pa nga maglakaw nga paluhod, ug mangadye og *Maghimaya ka Maria*, ug tanan na niining uban pa nga matang sa mga butang, ug ang mga pagpa-novena ngadto sa mga tawong patay na. Namatay si Jesus aron nga mahimong ipanghatag nga walay bayad ang Gasa sa Dios. Gibayaran na Niya sa hingpit ang utang. Apan nakita n’yo, gusto nato nga kinahanglan aduna pa sa kung unsang butang nga mahiapil sa pagsulti Niini.

¹⁴² Bantayi niini karon. Nangadto kining mga tawhana didto ug nanag-ingon, “Bueno, ginapaninguhaan mo sa imong kaugalingon nga ikaw ra ang tawo sa grupo. Nagadahum kang ikaw ra gayud.”

143 Ug gikapoy na si Moises diha kaniya. Miadto siya sa likod, miingon, “Amahan . . .”

144 Nag-ingon Siya, “Pahalayo ka gikan kanila. Ako—Ako—Akong . . .”

145 “Ang tanan—ang tanan nga dapig sa Dios, panganhi dinhi dapit.” Ug Iyang gibuka ang yuta ug gipanglamoy sila. Husto ba? Hunahunaa lang kini, igsoon. Oh, sus! Nganong wala man sila mitoo kaniya? Nganong wala man sila mitoo nga—nga—nga—nga kining si Moises mao kanang lider, nga iya sa Dios? Nganong gusto man nila makiglalis kaniya? Kanunay’ng nagabagulbol ug nagareklamo, sa dihang nakita na nila ang kamot sa Dios ug namuhat ilalum ni . . . Ug si Moises . . . Gipamatud-an na sa Dios nga—nga si Moises mao ang Iyang dinihogang Mesiyas. Nakita n’yo? Ug dayon na lang . . . Kita n’yo, sa kinahiladman sa ilang kasingkasing, nangandoy sila sa kung unsang lahi.

146 Unsa ma’y nangahitabo sa inyo nga mga Pentecostal? Sa milabay’ng pipila ka tuig nanggawas kamo sa nianang kalamukat nga gitawag og denominasyon, aron himoong Pentecostal ang inyong mga kaugalingon. Nganong gusto na usab ninyong mobalik niini? Kinahanglan nga mogawas ang pagkatipaka. (Wala pa dinhi ang Lugas, wala pa.) Kita n’yo? Himatikdi, ingon niana gayud ang ilang gibuhat. Atua kadto sa ilang kasingkasing. Kinahanglan nga buhaton nila kini.

147 Karon, kita n’yo, aduna niadto og usa ka panghunahuna si Dathan nga motukod og usa ka dakung relihiyon gikan niini. Kahibalo na mo, bisan ang apostol nga si Pedro nagkaaduna og mao gihapon nga panghunahuna didto sa Bukid sa Pagkabalhin og Panagway. Miingon siya, “Magbuhat kita og tulo ka mga tabernakulo dinhi; ang usa para kang Moises, ug ang usa para sa kasugoan, ug ang usa para sa mga propeta, ang usa . . .”

148 Ug samtang nga nagasulti pa siya niadto, dihay usa ka Tingog nga miabot, miingon, “Kini ang Akong Anak nga pinalangga. Patalinghugi ninyo Siya.” Dinha sa dihang milingi sila, si Jesus lang ang ilang nakita. Atua Siya nagtindog. Siya ang Pulong. Mao lang kana ang inyong patalinghugan, mao kanang Pulong. Siya kana sa unsa mang kapanahonan. Tan-awa kung unsa ang ginaingon sa Pulong alang nianang kapanahonan, ug bantayi ang Dios nga nagadihog Niini, ug nagauban Niini. Kana lang.

149 Ilang gisundan ang Haligi nga Kalayo padulong ngadto sa Yutang Saad. Kadtong mga dire-diretsong miuban milampos, ang uban nangamatay. Himatikdi, gusto nila nga ang Pulong mahisagol sa kalibutan . . . nahimong hinungdan nga nangasayup sila. Ug himatikdi kung unsay gibuhat niini kanila. Ang Pulong . . . Nasipyatan nila Kini tungod kay ayaw nilang dawaton ang dinihogan nga Pulong. Kita n’yo, kinahanglan aduna gyud ka’y mini . . . Kinahanglan una aduna gyud ka’y usa

nga tinuod, aron mahimo ang usa ka mini gikan niini. Ug aduna sila niini didto, ug gipakita sa Dios nga wala Siya nagauban niini.

¹⁵⁰ Hunahunaa kung unsa ka hingpit nga napaila ang Pulong ngadto kanila, sa pagpanghimatuod ngadto kanila. Ang tanan nga gipangpropesiya ni Moises manghitabo. Nga iyang gitawag aron dalhon sila ngadto niining Yutang Saad. Ang tanan nga gipropesiya ni Moises nangahitabo, didto mismo. Wala ni usa ka Pulong Niadto ang napakyas. Daw sa unsa ka dakung prebilihio unta kadto, ang mahibaloan nga nanaglakaw kamo didto sa kamingawan. . . Ug didto, human sa. . . Sa dihang gisultihan niya sila sa Mensahe, gikinahanglan nga toohan usá nila Kini. Apan human nga napahigawas na niya sila gikan didto, miingon na dayon ang Dios, “Pamatud-an Ko kanila nga Ako kadtong Haligi nga Kalayo nga imong natagbo didto sa kamingawan.”

¹⁵¹ Mao nga miingon Siya, “Tiguma silang tanan palibot sa maong bukid.” Ug mikanaug Siya ngadto sa kinatas-an sa Bukid sa Sinai. Ug misugod pagdalugdog ang Dios.

¹⁵² Ug miingon ang katawhan, “Ayaw na pasultiha ang Dios. Si Moises na ang pasultiha. Ayaw na. . .”

¹⁵³ Miingon ang Dios, “Dili na Ako makigsulti pa ngadto kanila nga ingon niini, apan magpatungha Ko alang kanila og usa ka propeta nga magasulti diha sa Akong Ngalan.” Kita n’yo? Busa makaplagan nato nga ingon na niana ang ginabuhát sa Dios sa una pa. Nganong dili man nila makita kana sa sugod pa lang? Ang makita kining mga butanga, ug dayon mobagulbol batok sa Mensahe nga maoy nagadala kanila ngadto sa Yutang Saad; nga nagpasugod kanila sa husto, ug nga ginadala sila ngadto sa Yutang Saad. Apan sa gihapon sila. . . gikinahanglan nilang mobagulbol batok Niini. Hunahunaa, kung unsa ka hingpit. . . kung unsa nga nakalakaw unta sila sa matag adlaw, nanaglakaw nga kauban ang Ginoo. Daw sa unsa ka maanindot ikinabuhi nga kinabuhi, didto mismo sa kamingawan! Pag-panahon sa kagabhion. . . Mangaon og manna sa buntag, nga nangahulog sa tibuok gabii.

¹⁵⁴ Kahibalo mo, nahimo na kining ordinaryo na lang ngadto kanila hangtud nga nanag-ingon sila, “Ginaluod na ang among kalag niini nga Tinapay.” Kita n’yo? Ug nahimong ingon na niana kini kanato. Mahunahuna ko lang ang gamay’ng mga pundok nga atong. . . diha lang sa akong gamay’ng ministerio, sa tibuok nasud. Ang makita nga dili lang mga pagpang-ayo ug ingon nianang mga butang; kanunay’ng ingon na niana. Pagpang-ayo; aduna kanunay ang Dios og paagian sa pagpang-ayo kon asa man. Aduna pa gani Siya og usa—usa—usa ka Manolunda didto sa usa ka lim-aw kaniadto. Ug Iyang. . . tanan na nga matang sa mga butang. Ang—ang tumbaga nga

bitin didto sa kamingawan. Dugay na mong adunay mga simbolo sa pagpang-ayo. (Dili kana ang akong ginahisgotan). Ang pagpang-ayo usa ka butang nga nagadani sa pagtagad sa mga tawo. Moamot ang si bisan kinsa ngadto sa usa ka buluhaton sa pagpang-ayo. Sila—sila'y moamot ngadto sa usa ka fiesta sa kantahan. Apan paghisgotan na ang bahin sa usa ka makaluluoy'ng naalaot nga kalag, wala na sila'y panginlabot niana. Kita n'yo, karon dili ba halos husto kana? Aduna na kanato ang tanan. . . pero sa usa ka makaluluoy'ng naalaot nga kalag. Ayaw na manginlabot niana. Pasagdan na nila siyang mangapkap ngadto sa unsa na lang. Moingon, “Bueno, okay lang kana, miyembro man siya sa iglesia. Dili kana makadaot sa bisan unsa man.”

155 Apan karon, makaplagaan nato dinhi. . . (Sa inagpas nga pagtapos na sa kutob nga mahimo nato dinhi.) Hunahunaa kung unsa ka hingpit kadto. Ginatan-aw ko balik ang—ang mga panahon nga ania kita sukad ibabaw niining yutaa. Tanawon kung unsa na'y nahimo sa Ginoong Dios. Nagsugod sa pagkadaghang mga ilhanan, ug mga katingalahan, ug mga milagro, nga nagpahalipay kanatong tanan. Dayon ang makita. . . Dayon ang Mensahe na nga nagasunod niini.

156 Ang mahimatikdan kung unsay nahitabo. Nagalakaw nga may kauban, dili lang diha sa imong kaugalingon, aduna ka'y mga tawong kauban. Ang makita ang pundok sa mga Manulonda nga mikanaug gikan sa Kalangitan, nga miuyog sa tibuok kalibutan, nga atua gayud didto. Ug gibalita kini didto sa mga mantalaan; sa dihang gisulti na kini daan sa daghang mga bulan sa wala pa kadto nahitabo. Atua Siyang nagtindog didto, ug miingon, “Haduol na ang panahon, pagbalik didto. Ablihi na ang mga tinago sa Pito ka mga Selyo nga dugay nang tinago sa tibuok panahon sa mga repormasyon ug ingon-anang mga butanga, ipadayag na kini.” Dayon ania na ang pagwali sa *Binhi Sa Serpente*, ug tanan na niining mga butanga sama niana. Ug unsa na'y gipangbuhat sa mga taga-simbahan? Imbis isulting. . . “Aba, nagsulti si Luther og *ingon niini* o *ingon niana*.” Ila gayud. . . Dili gayud nila kini makita. Kita n'yo? Apan daw sa unsa ka dakung pribilehiyo kini alang kanato nga nagatoo; ang maglakaw diha sa Presensiya sa Dios, matag adlaw.

157 Ang motindog didto ug makita nga nagagawas ang usa ka alimpulos gikan sa kawanangan. Gisiak niini ang usa ka bukid ngadto sa duha, nga atua didto kung asa kami dapit kaniadto; gipangbali ang itaas sa mga punoan ug mga butang nga sama niana. Ug usa ka lanog sa Pulong ang migawas ug miuyog didto sa makatulo ka higayon, miingon, “Bantayi ang pagpaingon niini ngadto sa West Coast.” Mipaingon mismo didto ug gitay-og ang Alaska. Ug mipaingon na mismo didto sa West Coast. Ingon ka eksakto gayud.

158 Sa adlaw nga wala pa kadto, mipunit ako og usa ka bato ug giitsa kini paitaas sa kawanangan, ug miingon, “MAO KINI ANG GINAINGON SA GINOO, ‘Ania na ang takna, mosugod na ang paghukom ngadto sa yuta. Ang mga linog ug tanan na magakahitabo. Ug pagatay-ugon ang tibuok nga West Coast ug uban pa.” Tan-awa kung unsa ka hingpit. Sa adlaw adlaw, ang tanan ingon ka eksakto gayud sa Iya nang giingon. Unsaon man nato sa pagpausab pa niini, mga igsoon? Ipadadayon nato ang atong pagtoo nga nakapa-direksyon ngadto Kaniya.

159 Moingon sila, “Kinsa man kini?” Nakaila kita kung kinsa Kini. Kini si Jesus Cristo ang mao sa gihapon kagahapon, karon, ug hangtud sa kahangturan, ang Haligi nga Kalayo. Sa panahon niadto ni Moises, tan-awa kung unsa ang gihimo Niadto; gitipo ang sa karon nga Haligi nga Kalayo. Kini kanunay’ng . . . Nganong wala man sila nanagpanoo kang Jesus nga mao ang Pulong? Aduna sila’y sayup nga interpretasyon ug pagsabot. Sama sa gibuhath ni Eva, mao man usab ang ginabuhath nila karon.

160 Kung ingon-ana si Balaam ug ang iyang doktrina husto gayud alang kanila. Ug eksaktong natagbo gayud ang ilang kagustohan. Didto sa maong fiesta, tan-awa . . . Didto sa Fiesta sa mga Moabitanhon, kita n’yo . . . Oh, kung unsa ang Iyang giingon. Tan-awa dinhi kung unsa ang usa ka hulagway nga mao sa karon, kung unsa nga gitipo kaniadto. (Napalangan ko na kamo og ayo.) Apan tan-awa, himatikdi, diha sa makadiyut lang, sa maong Fiesta sa mga Moabitanhon. Kita n’yo, kung dili niya silang dire-diretsong mapahiadto didto, nga gihimo ni Balaam, kung ingon-ana iya silang giorganisang mahiusa. Kung dili niya mismo silang matunglo . . . Mas samot niyang gitunglo, mas samot pang gipanalanginan sa Dios. Mipadayon pang . . .

161 Kita n’yo, mao kana’y iyang gibuhath ngadto sa mga Pentecostal. Nanag-ingon sila mga pipila na ka tuig ang milabay, sa dihang nagasugod pa kamong tanan, “Wala gyud mo’y paingnan. Wala ra kanang inyoha. Kamo, mangahago ra mo. Usa ra mo ka pundok sa panatissimo.” Apan sa matag higayon nga sulayan nila kamong tunglohon, nagabalik ra mo mismo gihapon. Padayon nga ginapadayag sa Dios ang Iyang Mensahe. Sugod pa niadtong daan nga Asembliya, kaniadtong pagsugod pa, sa Pangkinatibuk-ang Konseho. Dayon nahipasulod Siya sa dihang gidawat nila ang Ngalan ni Jesus Cristo para sa bautismo sa tubig. Dayon milukso ang usa pa-niining direksyon, ug ang usa sa lain usab, ug ang usa mihawa . . . ; nag-organisa *niini* ug *niana*. Padayon nga nagpanalangin ang Dios.

162 Karon, bueno, nakita niyang dili niya kamong matunglo. Kita n’yo? Busa unsay iyang pagabuhaton? Iya kamong paga-organisahan. Dalhon kamo . . . “Oh, usa ra man kita tanan.” Kita n’yo? “Nagatoo man kitang tanan sa mao ra nga Dios.”

Busa mao gayud kadto ang gibuhat ni Balaam. Ug dili ba nga gipasidan-an na kita ni Jude niini? Nahimo nila ang kasaypanan sa agi ni . . . sa doktrina ni Balaam ug nangalaglag diha sa pagsupil ni Korah. Dili ba si Jude, ang gikaigsoon nga lalaki ni Jesus, nagpasidaan niini kanato diha sa Biblia? Susama sila ni Cain, sukad pa sa kinasugdanan, nga sinuholan. Ang mao nga nagasimba kaniadto ug nga nagpangtukod og mga kasimbahanan ug—ug ang nagtukod og halaran ug nga naghalad. Nangahimo nila ang kasaypanan sa agi ni Cain. Nanggisubay sila sa binuhatan ni Balaam. Ug nangalaglag diha sa pagsupil ni Korah. Gibutyag ni Jude ang maong tibuok butang sama sa atong ginabuhat niini karong buntaga, dinhi sa inyong atubangan, ingon nga dugay na natong ginabuhat kini. Nahibutyag na ang maong tibuok butang dinha.

¹⁶³ Nangalaglag sila diha sa pagsupil ni Korah. Hunahunaa lang kana, kung unsa ka daotan kadto. Ang mahunahuna gayud kung unsa nga si Korah . . . Kita n'yo, miingon siya, “Karon, mangadto kita tanan sa fiesta. Usa ra kita tanan.” Nagatoo sa Dios niadto ang mga Moabitanhon. Kadto ang mga anak sa anak nga babaye ni Lot. Kita n'yo? “Nagatoo kita tanan sa usa ra ka Dios.” Sa pagka-pundamental, eksaktong husto gayud sila. Himatikdi si Balaam didto, ingon ka-pundamental gayud sama ni kinsa man nga Baptist o Presbyterian sa karon. Miadto siya didto ug atua didto ang Israel, ang kadtong wala nag-denominasyon . . . Usa sila ka nasud. Dili pa usa ka nasud niadto ang Israel. Usa pa kadto ka katawhan niadtong panahona. Dili na nila gustong mosubay sa pamaagi sa Dios, pagkahuman sa pipila ka panahon. Gusto na nilang mamahimo nga sama na sa uban pang mga nasud. Dinha sila napakyas. Apan samtang nga gusto pa nilang mopabilin diha sa Dios, okey pa.

¹⁶⁴ Paggawas ni Balaam, milantaw siya didto, miingon, “Bueno, sus! Kahibalo ko nga ang usa sa ilang mga ministro giminyoan ang asawa sa laing lalaki.” Ang tanan nang uban pa niining mga butanga, oh sigurado, daghan sila niana. Nahikalimtan niyang dunggon ang singgit sa—sa Hari sa sulod sa maong kampo. Wala gayud niya nakita ang kadtong hinampak nga Bato, ug ang kadtong tumbaga nga serpente nga nagbitay didto alang sa usa ka panghimayad. Wala niya naamgo nga wala sila gayud nakakonekta sa usa man nga organisasyon. Nakakonekta sila ngadto sa Pakigsaad sa Dios, ug nga nagalakaw diha niana. Kita n'yo? Ug miingon si Balaam, sa pagka-pundamental, “Tukoran mo ako og pito ka halaran.” Mao kadto ang gikinahanglan ni Jehovah. Mao kadto ang nadawat ni Jehovah gikan sa maong luyogluyo. “Sige, ibutang sa ibabaw niini ang pito ka nating vaca.” Mao kana kung unsa ang ilang ginabuhat sa ubos didto sulod niadto nga kampo. “Pabutangi ko ibabaw niini og pito ka lakeng carnero tungod kay adunay magaabot nga usa ka Mesiyas sa umalabot.” Bueno.

¹⁶⁵ Kita n'yo, sa pagka-pundamental, pareho silang husto; sa pagka-pundamental. Kita n'yo? Apan usa niadto ka adlaw sa dihang nakita niya nga dili niya siya madani niana, miingon siya, "Kung mahimo nga magkauban na lang nga iorganisa nato ang atong mga kaugalingon kung ingon-ana." Ug dinha kon diin nahimo nila ang ilang kasaypanan.

¹⁶⁶ Ug dinha gayud eksakto kon diin nahimo sa Pentecostal ang kasaypanan niini; sa dihang nag-organisa kini balik sama sa uban pang mga kaiglesiahan. Dili ako kaaway ninyo. Igsoon ako ninyo. Pipila niining mga adlaw makaplagaan ninyo nga kamatuoran kana. Mahimong moabot pa og taudtaod, pipila pa ka pagtuyok sa adlaw, apan moabot ang adlaw nga makita ninyong husto kana.

¹⁶⁷ Dayon naigo sila sa doktrina ni Balaam nga gayu'y . . . Mao man kadto ang ilang gusto. "Usa ra kitang tanan." Kita n'yo? Busa, atua nakig-uban na sila. Ang tanan nilang mga propeta ug tanan na nanag-uban na mismo kanila. Ug didto na sa maong fiesta, ang mao rang mga tawhana nanag-ingon, "Ug kaming tanan nagatoo nga adunay usa ra ka Dios. Toohan nato kini." Eksaktong mao gayud nga dugay na nilang gipaabot, eksaktong mao gayud.

¹⁶⁸ Karon sa diha nga halos dili magkasinabot ang Methodist ug Baptist tungod sa ilang organisasyon, apan sa dihang adunay moabot nga usa ka pangulong organisasyon, nga mahimo kitang tanan magkahiniusa, okay na ang tanan. "Oh," moingon kamo, "dili gayud kini dawaton sa mga Pentecostal." Dili ba? Unsa ma'y ilang gibuhath didto sa Missouri sa miaging adlaw? Nabasa man ninyo ang inyong mantalaan, sigurado. Kita n'yo? Dili ba ninyo buhaton? Dili, dili kamong mga Pentecostal, kamo nga mga tawo; apan dili niini kamo, ang kadto nga pamunoan didto ang maong nagamaniobra kaninyo. Ang kanang pamunoan ang maong nagamaniobra diha kaninyo. Husto kana. Ayaw gayud kamo pag-apil niani. Pagpahilayo kamo nianang butanga, mao kana ang marka sa mapintas nga mananap. Pagpahilingkawas kamo gikan niana sa ingon ka agpas nga mahimo ninyo. Kita n'yo? Kana ang pang-iglesiang . . . Ang kanang ulohang pamunoan ang maong nagamaniobra.

¹⁶⁹ Wala unta kita nakahinayak ug nakapakiggubat sa Germany o sa tanan nang uban pa niini. Kung dili pa tungod niining . . . sa pipila niining dagkung mga pulitikong nagaplano dinhi sa pagpamuhath og bag-ong mga armas ug mosugod . . . Dili ko gusto ang kuwarta nga gikan sa . . . kuwarta nga baylo sa dugo sa kaugalingon kong anak, nga kinahanglan paadtoon didto ug mamatay tungod niini. Kita n'yo? Apan ingon niana gayud kini, pulitika ang nagahimo niini. Ug kontrolado na sa Yawa ang tibuok kalibutan. Eksaktong mao gayud kana ang giingon ni Jesus. Ug dili gayud kini mahitul-id pa gawas kung Milenyum na, sa dihang moabot na si Jesus ug nga modumala na. Apan sa

karon aduna pa kita niini nga mga problema. (Dalion ko na aron nga mahuman na nato karon.)

170 Mao gayud kung unsa ang dugay nang gipangita . . . ang mao gayud nga butang. Mao gayud kung unsa ang dugay na nilang gusto. Ang kadaugan ni Satanas didto sa maong Moabitanhon nga Fiesta. Aduna siya'y usa pa nga moabot, usab. Ginatigum na niya silang tanan sa mao ra gihapon nga pamaagi. Sa makadiyut lang . . . Sa hinanali! Hunahunaa lang kung unsa na'y ilang nahimo. Sama ra kung unsa kini kaniadto. Dili na gayud kinahanglan pa ang usa ka dinagkung, pang-dugay, pang-tulo o pang-upat pa ka tuig sa pagplano niini. Sila . . . sa maong mini nga propeta, ang tawong wala nagpanumbaling sa Pulong sa Dios . . . sa matag pagpasidaan nga gipadala sa Dios sa tibuok nasud, ug nga nagsulti kanila, "Panggula kamo gikan niini! Panggula kamo gikan niini! Panggula kamo gikan niini!" Ayaw nilang buhaton kini. Managpabilin sila mismo didto.

171 Wala nila ginapanumbaling ang Pulong sa Dios, wala ginapanumbaling ang maong mga Pulong, wala ginapanumbaling ang mga ilhanan, wala ginapanumbaling ang mga butang kung asa atua kita. Ug padayon lang gihapon, "Maangkon nato kini sa gihapon. Paingon na kita mismo didto. Kinahanglan maangkon nato kini. Kana lang. Usa ra kitang tanan." Kita n'yo na ang kabuang sa Yawa? Mao ra gihapon kana nga butang ang ilang gihimo didto sa Fiesta sa Nicaea, sa Nicaea, sa Roma. Nagtukod sila og usa ka organisasyon gikan niini, ug mao kana ang nahitabo. Nagkaaduna si Satanas og usa ka Fiesta sa Nicaea. Oh, sus! Ug sukad niadto . . . Paminaw, mosulti ako og usa ka mabug-at nga pagpanulti dinhi karon. Ug kamong anaa diha sa teyp nga gustong makiglalis bahin niini, lalisa ang inyong kaugalingon, ug ang kasaysayan, ug ang Biblia, kita n'yo, apan dili dinhi kanako.

172 Paminaw! Sa matag higayon nga ang Dios nagapadala og usa ka mensahero ug sugdan ang usa ka Mensahe . . . Ug sa diha nga kana nga iglesia, sa dihang kana nga grupo sa mga tawo nakig-uban na ngadto sa maong mga pang-denominasyon nga fiesta . . . Dinha na kon diin nila nangahimo kini. Dinha kon diin nangahimo ninyo kini kamong mga Assemblies. Dinha kon diin nangahimo ninyo kini kamong mga Oneness. Dinha kon diin nangahimo ninyo kini kamong mga uban pa, diha sa inyong mga pang-denominasyon nga fiesta, nga ginabalik mismo ang inyong mga kaugalingon ngadto nianang mao rang butang nga gitunglo na sa Dios sa sugod pa lang. Eksaktong mao gayud kana ang Kamatuoran. Sa unsa mang panahon nga nagkaaduna ang iglesia og usa ka rebaybal . . . Niadtong panahon ni Luther, dayon usa ka . . . Unsay nahitabo? Ang mga Methodist . . . sa tibuok nga mga kapanahunan . . . kang Zwingli, Finley, Finney, tanan nang uban pa kanila, pag-aduna sila'y rebaybal, unsa ma'y ilang gipangbuhat niini? Gihatud kini mismo ngadto sa usa

ka pang-denominasyon nga fiesta, ug hinayhinay nga ningsulod dungan sa uban pa kanila, gibutangan kamo og ngalan sama sa uban pa kanila. Aduna na kamo dayon og usa ka pundok sa mga tawong nagakontrola kaninyo. Ang Balaang Espiritu dili na makapanglihok pa. Eksaktong ingon-ana gayud. Mosugod ka'g wali sa usa ka butang nga ginatudlo sa Biblia, sama niini, ug nga ang maong denominasyon wala mitoo niana; mismo kang ipalagpot. Sulayi kini sa makausa ug tan-awa kung husto ba kini o dili. Makita mo nga Kamatuoran kini. Kita n'yo, sa matag higayon nga mopatawag sila niining fiesta pang-denominasyon, kanang fiesta ni Balaam, nagaabot ang problema. Oh, si Luther, Wesley, ang Pentecostal, ug tanan sila mga biktima niini.

¹⁷³ Himatikdi, nahitabo kini kaniadto, aleluyah, sa dihang milakaw si Moises sa atubang ug miingon, “Kinsa man ang dapig kanako ug sa Dios?” Amen! Nahitabo kini dayon nga gihublot sa Levihanon ang iyang espada ug gilipot ang tibuok kampo ug gipangpatay gayud ang tanan-tanan nga adunay kahilambigitan niini. Amen! Ang tanan-tanan; ang matag kalalaken-an nga nagkaaduna og babayang Moabitanhon, dungan nila silang gipangpatay mismo. Karon miabot na ang maong takna. Asa na kanang tawhana? Asa na ang mga anak nga lalaki ni Aaron, ang uban sa mga saserdote nga andam sa paghublot sa Pulong sa Dios, kining mahait nga duhay sulab nga Espada? Nag-ingon, “Kinsa man ang nagadapig kanako ug sa Dios?” Asa man siya? Mahimong dapiton, ginadapit apan wala’y nagatubag. Nakita n’yo kung unsay akong ipasabot? Dili nato makuha kini. Ato lang... Aduna gyu’y sa kung unsang sayup. Himatikdi, atua sila kaniadto... Mao na kadto dayon nga mitindog si Moises ug gisulti kining mga butanga.

¹⁷⁴ Himatikdi, ang ilang sala, nga ilang gipanghimo didto, sa dihang gihimo nila ang ilang kaugalingon nga denominasyon uban sa mga Moabitanhon ug gihimo nga usa na sila ka lawas... Kadto nga sala wala gayud napasaylo diha kanila. Agihan ko lang kana sa pipila ka minuto. (Udto na, pero kadali lang.) Ang ilang sala wala gayud napasaylo diha kanila. Wala ni usa kanila ang nakaabot sa Yutang Saad. Nag-ingon si Jesus, diha sa... Pasayloa ko. Sa San Juan 6, nag-ingon si Jesus; diha sa San Juan 6, sa dihang miingon sila, “Nanagpangaon man og manna ang among mga ginikanan didto sa kamingawan”... Mga Pentecostal sila niadto. Igsoon, nakakaon sila og manna, tinuod gyud nga butang ang atua kanila.

¹⁷⁵ Nag-ingon si Jesus, “Ug sila, matag usa kanila, patay na. Nangamatay sila. Nangalaglag sila sa Walay Katapusan.” Wala gayud sila gipasaylo sa ilang kasal-anan. Unsa ma’y ilang nahimo? Ilang gilapas ang ilang pakigsaad sa Dios, ug nakig-organisa uban kang Balaam, ang sinuholan nga propeta nga ayaw tagdon ang pagpasidaan sa Dios; ayaw dawaton ang Pulong sa Dios; ayaw modawat og unsa man nga iyaha sa

Dios. Apan determinado gayud siya nga mahimo silang tanan nga usa ra. Makita n'yo ba ang maong kabuang? Mahimo akong mopabilin dinha sa taastaas nga oras, apan akong—nahunahunaan ko nga nasabtan na ninyo kini. Kita n'yo? Himatikdi, wala gayud sila gipasaylo diha sa ilang kasalanan; wala ni usa kanila ang nabuhi ilalum niadto nga mga pagpanalangin ug pagpangaon niadto nga manna ug tanan na.

¹⁷⁶ Sa diha nga ang usa ka tinuod, matuod nga Mensahe miabot ngadto sa usa ka pagpakigsangka, giorganisa nila kini. “Hiusahon nato ang mga Moabitanhon ug ang atong mga kaugalingon. Usa sila ka bantugan nga organisasyon, usa ka bantugan nga nasud. Dili gani kita . . . Dili pa gani kita usa ka nasud. Magminyoay na lang kita sa usa'g usa ug—ug magma-okey na kitang tanan kung ingon-ana. Makauban na nato sila.” Ug wala gayud kadto gipasaylo; wala gayud, wala gayud sila gipasaylo niadto.

¹⁷⁷ Miingon si Jesus, “Sila, ang matag usa, *patay na*.” Hubara kana nga pulong diha sa Hebreohanon og Griyego, hain man niini, o bisan pa sa Inglis, nagakahulogan kini'g “Pagkabulag sa Walay Katapusan”; ang dayon nga pagkalaglag. Husto kana.

¹⁷⁸ Oh, oo, nakita nila ang mga milagro. Nakita nila ang Pulong nga dinihogan. Nanagpangaon sila og manna nga gikan sa Langit. Nakapahimulos sila sa panalangin sa panghimayad. Nakita nila ang maong hinampak nga Bato nga nagpaagas sa Iyahang tubig. Nanagpanginom sila Niini. Personal sila nga nakasinati Niini. Apan pag-abot na diha sa pagpahayag niadto nga Pulong . . . Ayaw gayud kalimti kana! Sa dihang miingon si Jesus, “Ako ug ang Akong Amahan usa ra,” wala gayud miingon nga adunay tulo. Huh? Sa diha nga ang tanan niining uban pang mga halangdong pundamental sa Kasulatan . . .

¹⁷⁹ Usa ka lalaki ang miduol kanako sa miaging gabii aron ikapakita kanako nga asa ako misayup, o aron hisgotan ang bahin sa trinidad. Aduna ko'y linibo nga mga higalang nagatoo sa trinidad. Anaa sila nianang Babilonia. Aduna ako'y daghan nga mga higalang Oneness nga anaa nianang Babilonia, usab. Kita n'yo? Apan unsa ma'y nahitabo? Ang ingon niya, “Sa terminolohiya lang kini, Igsoong Branham. Nagatoo ka ba sa trinidad?”

¹⁸⁰ Ingon ko, “Oo.” Ingon ko, “Dawaton ko ang imong gisulti: sa terminolohiya.” Ingon ko, “Giunsa mo man pag-too niini?”

Ingon niya, “Nagatoo ako sa usa ra ka Dios.”

Ang ingon ko, “Maayo kaayo.” Kita n'yo?

Ingon niya, “Nagatoo ako nga adunay usa ra ka Dios, ug adunay tulo ka mga persona diha sa pagka-Dios.”

Ingon ko, “Ikaw ba'y usa—usa ka estudyante sa BIOLA?”

Ang ingon niya, “Oo.”

¹⁸¹ Ingon ko, “Mora og ingon niana.” Ingon ko, “Dili lang maayo kaayo ang pagpaila niana alang sa imong maayong edukasyon.” Ingon ko, “Tulo ka persona, ug usa ra ka Dios?” Ingon ko, “Sumala kang Webster, dinha, kinahanglan aduna kini og usa ka personalidad sa dili pa mamahimong usa ka persona kini. Tulo ka dios ang ginatooan mo, mister.” Dili ka mamahimong usa ka persona ingon nga walay usa ka personalidad, tungod kay nagkinahanglan kini usá og usa ka personalidad aron mamahimong usa ka persona.

¹⁸² Busa ang ginaingon nila . . . Ang ingon niya, “Bueno, Mister Branham, kahibalo ka, bisan gani ang mga teologo dili makasaysay niini.”

¹⁸³ Ang ingon ko, “Eksakto gayud kana. Ang Pulong wala nagaabot ngadto sa usa ka teologo.” Uh-huh. Ingon ko, “Nakatakdo tanan ang Biblia ngadto sa Kapadayagan, ‘Sa ibabaw niining bato pagatukoron Ko ang Akong Iglesia, ug ang ganghaan sa hades dili makabuntog Niini.’” Kita n’yo? Amen, tan-awa n’yo. Kita n’yo? Apan dayon pag-abot na mahitungod niadtong mga butanga . . . oh, sus!

¹⁸⁴ Karon gusto na natong dalion ug hunongon na dayon kung mahimo nato. Kinahanglan kong laktawan na ang uban niining mga Kasulatan ug mga sinulat ko, kita n’yo. Karon, himatikdi, wala gayud sila gipasaylo sa kung unsay ilang gipanghimo. Unsa ma’y ilang gibuhat? Gipahimuslan nila ang maong mga panalangin. Ayaw kalimti kana. Gusto kong isulti kini pag-usab. Wala gayud sila gipasaylo tungod niini. Hinumdumi, kini nga teyp nagalibot sa tibuok kalibutan. Kita n’yo? Ginapatukar kini sa mga pundok didto sa Aprika, India, sa tibuok kalibutan; ginahubad sa nagkalainlaing mga pinulongan; ug nagkalainlaing mga pundok, nagkalainlaing mga lugar. Wala gayud gipasaylo ang maong sala. Unsa man? Sila’y . . .

¹⁸⁵ Moingon ka, “Bueno, dalaygon ang Dios, ako—gibuhat ko kini. Ako—ako—nabuhat ko kini. Nakakaon ako og Langitnong Manna. Akong . . .”

¹⁸⁶ Oo, gibuhat nila, usab. Ug nag-ingon si Jesus, “Sila, ang matag usa kanila, patay na.” Apan pag-abot na ngadto sa eksaktong Mensahe, kon diin, wala unta nila kadto gilapas nga Pagpakigsaad, sa pagpakig-uban sa usa pa ka nasud. Usa ka tigpahilain ang Dios ug Iyang gihilain kadto nga katawhan, ug dili sila angay unta makipaghilambigit sa laing uban pa, makigminyo man ngadto niini. Ug ang tinuod, tinuod gayud nga Iglesia ug ang Pangasaw-onon ni Cristo, nahiusa na ngadto kang Cristo nga mao ang Pulong. Ug wala ka nagapakigminyo ngadto sa unsa mang organisasyon, unsa mang denominasyon. Tukma kang nagapabilin kang Cristo ug sa nianang Pulong, ingon nga usa ka indibidwal. Ang pagpakigminyo sa unsa

mang organisasyon mao ang pagkahimulag sa Dios sa Walay Katapusan. Nagalaum ako nga nasabtan kana sa tanan.

¹⁸⁷ Karon, diha sa atong teksto, hapit na niadto ang Fiesta sa Kasaulogan sa Pagsaylo; pahiduol na. Usa kadto ka makuyaw nga panahon. Nangatulog na niadto ang mga tawo didto na sa gawas sa maong mga ganghaan. Nagakahitabo kini sa matag kasaulogan sa pagsaylo. Didto sila sa gawas nga nanghigda na sa yuta. Puno ang mga balay sak-anan ug tanan na. Kasaulogan kadto sa pagsaylo. Adunay dagkung mga pagpaabot niadto nga adunay mahitabo. Puno tanan ang palibot. (Karon, sulod sa mga lima pa ka minuto mahuman na ako, kong itugot sa Ginoo, o mga napulo.) Ang tanan niadto dagha'y ginabuhat.

¹⁸⁸ Tan-awa, adunay tulo ka matang sa mga tawo kaniadto. Kita n'yo, aduna niadto og dakung mga pagpaabot nga adunay mahitabo. Nasayod sila nga kining talagsaon nga lalaki paabot na niini nga fiesta. Ang uban kanila *nahigugma* Kaniya; nanagtoo sila Kaniya. Ang uban kanila *nagdumot* Kaniya; nagdumot Kaniya ang kadaghanan kanila. Ug tungod kay nahigugma Kaniya ang usa ug ang usa pa nagdumot Kaniya, ang tawong anaa sa tungatunga *wala nahibalo* kung unsay pagabuhaton. Kita n'yo? Wala sila nahibalo. Himatikdi, ang kahimtang niadto puno sa mga pagpaabot nga adunay mahitabo. Ang usa moingon, "Sa dihang moabot na Siya didto, sultihan ko kamo ato Siyang tawagon . . . Testingan nato Siya diha sa Pulong. Patindogon nato Siya didto sa tupad sa labaw'ng sacerdote. Tanawon nato kung unsa gayud ang Iyang kaalam batok diha kang Caifas." Iya na gayud kadtong napamatud-an. Kita n'yo?

¹⁸⁹ "Apan buhaton nato kini: Tan-awon nato . . . Kahibalo ko nga dili gayud Siya undangan sa pila sa maong mga halangdon nga lider. Sus, kilatison gayud nila kanang tawhana. Ipahibalo nila Kaniya kung unsa Siya niadto, sa diha nga nagabinuang sila sa atong mga sacerdote. Sus, kahibalo gyud sila kung unsa'y ilang ginahimo. Maantigo silang mga tawo. Kahibalo sila kung unsay ilang ginahimo."

¹⁹⁰ Miingon ang uban, "Unsa kaha ang ilang pagabuhaton nianang tawhana."

¹⁹¹ Ang uban miingon, "Oh, ginahulat ko Siyang moabot. Anaa Kaniya ang Dios. Siya ang kana nga Pulong. Oh, ako gyu'y—Gusto ko gayud Siya makita." Kita n'yo? Oh, nagkabahinbahin sila. Karon, kita n'yo, ang kadtong mga nakaila Kaniya ug nagtoo Kaniya, nahibalo kung unsa nga ganghaan sila mohulat. Kita n'yo? Nahibalo sila kung hain nga agianan Siya moagi. Adunay dakung pagpaabot, apan kahibalo mo, dili kaayo daghan ang nakakita Kaniya. Kita n'yo, daghan ang wala nakakita Kaniya. Mao usab kini sa karon.

¹⁹² Ang uban kanila miingon, "Usa Siya ka maayo nga tawo. Oh, walay unsa man nga pagkadaotan diha Kaniya. Sama kang

Napoleon, Washington, usa siya ka maayo nga tawo. Apan, oh, ingon nga usa ka magtutudlo, dili, dili.”

¹⁹³ Uban kanila nanag-ingon, “Oh, usa Siya ka maayo nga tawo. Oh, Siya—nalibog lang Siya, kana lang. Usa Siya ka maayong tawo. Walay si kinsa man ang makasulti og dili maayo bahin Kaniya.”

¹⁹⁴ Ang uban miingon, “Dili, Siya—usa Siya ka yawa. Masulti ko kaninyo nga—nga aduna sa kung unsa nga pagbasa sa hunahuna dinha ug tanan nang uban pa niining mga butanga, ug kana—bakak kana nga pagpropesiya. Supak kini sa atong kredo. Ayaw pag-too sa ingon-anang butang nga sama niana.”

¹⁹⁵ Ug ang laing usa, miingon, “Himaya sa Dios, ang Dios Kini. Nakaila ako Kaniya. Nakita nako.” Ug nanaghulat sila niadto. Karon ingon niana gayud ang gikahimutangan nato sa karon, kondili ang mao ra nga butang: ang dinihogan nga Pulong alang niining taknaa; ang Kapanahonan sa Iglesiang Laodicea.

¹⁹⁶ Karon tapuson na nato sa pagsulti niini. (Sa kadali lang.) Tulo ka matang ang nanaghulat Kaniya. Mao usab niini sa karon, husto kana, tulo. Himatikdi, nanagsinggit niadto ang mga magtotoo. Kita n’yo? Kita n’yo? Ang Iyang ministerio mao ang nagpaaghat nga higugmaon Siya sa uban, dumtan sa uban, ug kalibugan sa usa pa ka matang. Kita n’yo? Ang Iyang ministerio . . . Tugoti kong ikutlo kana pag-usab. Ang Iyang ministerio, kung unsa man kadto . . . Nahibalo na kita karon, mao Kadto ang Pulong. Apan ang Iyang *ministerio* mao ang nagpaaghat sa uban nga mga tawo nga higugmaon Siya. Gipili na silang daan aron buhaton kana. Kita n’yo, nanagpanoo sila niini. Nakita nila kini. Wala na . . . Sa dihang miduol si Natanael didto, ug—ug giingnan Niya siya kung unsa ang gihimo niya niadto sama *niana*, miingon siya, “Rabbi, Ikaw ang Anak sa Dios. Ikaw ang Hari sa Israel, wala gayu’y duhaduha diha sa akong hunahuna.”

¹⁹⁷ Si Simon nga atua nagatindog didto, miingon, “Oh, Andres, dili ko moadto didto. Nadungog ko na kana didto nga butang sa una pa.”

¹⁹⁸ “Pero,” ingon ni Andres, “angay gayud kang moadto. Angay gayud nga adtoan mo, adtoi lang sa makausa nga uban ako.”

¹⁹⁹ Ug samtang nga naglingkod Siya didto, nakita siya ni Jesus nga nagapaduol, kahibalo na mo, nga nagapaduol. Miingon, “Simon ang imong ngalan. Anak ka ni Jonas.” Wala na dayon pagduhaduha pa. Kita n’yo, ingon niana lang. Atua sila didto. Gitooan nila kini. Nakita nila kini. Nailhan nila nga mao kadto ang pagabuhaton gayud sa Mesiyas pagmoabot na Siya.

²⁰⁰ Kinahanglan nga mamahimo Siyang usa ka Propeta, kay nag-ingon si Moises, “Mamahimo Siyang usa ka Propeta.” Ug kadtong mga katahap sa mga upat na ka gatus ka tuig nga walay propeta. Nagkinahanglan niadto og usa ka propeta aron tul-

iron kini, kanunay sa matag kapanahonan. Ug ania Siya nga nagatindog didto.

²⁰¹ Wala gyu'y pagduhaduha kanila. Nanaghulat sila didto nga aduna na'y mga palmera sa ilang kamot, "Dili magdugay moagi na Siya." Nanaghulat!

²⁰² Ang tibuok siyudad, tensiyonado. Ingong nila, "Usa ka pundok kadto sa mga panatiko nga nanggitigum didto sa ganghaan."

²⁰³ Ang usa pa miingon, "Unsa kaha ang Iyang buhaton pagmoabot na Siya dinhi. Kahibalo mo, ako—nagtoo gayud ko nga usa Siya ka tigpakaaron-ingnon. Nagtoo gyud ko nga aduna Siya'y sul-ob nga tiil sa rabbit nga Iyang ginanusnus sa Iyang dalunggan, kahibalo na mo, o sa kung unsa nga sama niana, kahibalo na mo.

²⁰⁴ Ug sama sa ginasulti nila sa karon, "Oh, usa kini ka matang sa pagbasa sa hunahuna. Kini—usa ka butang kini nga..." Mahimo nilang isaysay kini sa ingon niana na lang.

²⁰⁵ Aduna pa'y usa nga miingon, "Yawa kana. Pagpabilin mo niini nga dapit sa siyudad. Ayaw gayud pagpahilambigit niana. Ayaw pagpakigtimbayayong niana nga nangtigum. Ayaw gayud pag-adto didto, kita n'yo. Ayaw natong magkaadunay kahilambigitan niini." Tulo ka matang sa mga tawo.

²⁰⁶ Karon himatikdi. Karon ania Siya nga nagapangabayo pasulod na sa maong siyudad. Sa eksaktong giingon na sa Pulong nga Iyang pagabuhaton. Nga nagasakay diha sa usa ka gamay'ng asno, pasulod ngadto sa siyudad. Kadtong mga wala nagatan-aw sa kredo, wala nagatan-aw sa Templo, wala man lang nagatan-aw sa tanang uban pa niining mga butanga, wala nagatan-aw sa mga sacerdote, daw sa unsa gayud ang ilang masulti. Kadtong mga nanagtoo Kaniya, nanggitindog sila didto nga adunay mga palmera sa ilang kamot. Nanaghulat lang sa unang paglihok. Wala gayud ka'y madungog kanila nga nagaingon, "Kinsa man kining nagaabot?" Oh, wala! Nailhan nila kung Kinsa kadtong nagaabot. Nasayod sila kung unsay giingon sa Pulong. Kita n'yo? Ug ang maong uban nga matang, makita sila didto sa likud sa maong siyudad? Ug dayon sa nadungog nila kini nga kaguliyang: "Hosanna ngadto sa Hari! Hosanna ngadto sa Hari nga nagaanhi sa Ngalan sa Ginoo. Hosanna! Hosanna!" Ug ang tanan na nga paghinugyaw!

²⁰⁷ Ningdagan pagawas ang mga sacerdote aron tan-awon kung bahin ba sa unsa kining pang-relihiyon nga kaguliyang. Ug nangutana ang mga tawo, "Kinsa man kini?" Alang ba sa unsa nga nanganha man sila, mga higala? Usa ka pang-relihiyong kasaulogan! Ang mismong Dios nga nagsugo kanila nga isaulog kini nga Kasaulogan, nag-ingon na kanila nga mamaatua Siya didto sama sa ingon niana gayud, ug nanagpangutana pa sila, "Kinsa man kini?"

208 Walay pagkabalhin ang panahon. Gidisenyo ang mga tawo nga sama ra sa kung unsa sila kaniadto. Nag-ingon ang Mga Hebreohanon 13:8, “Siya mao sa gihapon kagahapon, karon ug hangtud sa kahangturan.” Karon magatapos ako nga nagasulti niini: Ang pangutana dili na ngadto kanila. Nangutana sila niadto, “Kinsa kini?” Apan sa 1964, ang pangutana maoy: “Unsa ma’y ingon n’yo kung kinsa kini?” Mahitungod ba sa unsa ang tanan niini? Mihunong ba mo usá aron susihon ang Kasulatan? Kinsa ba Kini sa tan-aw ninyo? Pagbasa ba kini sa hunahuna? Kini ba’y usa ka ihalas nga butang nga gikan pa sa kamingawan didto kon asa man, sama sa giingon nila niadto, “Si Juan usa ka tawong, ihalas, nga ginapanglumsan ang mga tawo sa tubig didto.” Sa dihang, si Isaias nag-ingon na nga mamaatua siya didto, ang maong mag-uuna. Si Malaquias nag-ingon na nga eksaktong mamaatua gayud siya didto. Silang mga propeta nanag-ingon, “Kini nga propeta magatungha mismo didto aron sa pag-una niini.” Ug ania na siya.

209 Miingon sila, “Tawong ihalas kana. Pagpahilayo kaniya. Kita n’yo? Ayaw pagpakighilambigit kaniya.” Ug ania na nagaabot ang Mesiya, sa ingon ka eksakto gayud kung unsay giingon sa Kasulatan, “Nga mosulod Siya sa siyudad nga nakasakay sa nati sa asno. Maaghop ug mapaubsanon, nga nakasakay sa nati sa asno, nga nagasulod sa siyudad, aron mamatuman ang Mga Kasulatan.” Ug ania nagatindog ang mga tawo didto sa usa ka pang-relihiyosong kasaulogan pag-usab, sama ni Balaam, didto sa usa ka pang-relihiyosong kasaulogan, nga nagaingon, “Kinsa man kini?”

210 Ug karon, ang gikasaad nga mga Kasulatan alang niining taknaa, mga higala, nangatuman na Kini mismo sa atong taliwala, oras-oras. Unsa ma’y tan-aw n’yo kung kinsa Kini? Tun-an nato ang bahin Niini diha sa pagduko sa atong mga ulo.

211 Minahal nga Dios, kaming tanan kinasingkasing nga nagapamalandong, sa halawum, tungod kay kinahanglan namong buhaton kini. Anaa na kini sa among mga kamot, Ginoo. Ang makita Ka namo, ang maong gamhanang Hari. Makita namo ang Imong saad bahin sa Pulong. Dugay na nga mga katuigan kaming nagapaabot alang niini, alang niining nagasingabot nga halangdong higayon, kon diin nga kami nagapuyo mismo karon. Makita namo ang Imong dinihogan nga Pulong diha sa Imong mga tawo, nga gikinabuhi Kini, sa eksakto gayud kung unsay Imo nang giingon nga mahitabo. Makita namo ang dinihogan nga pundok ni Satanas didto sa pikas. Ug among napahitakdo Kini sa tibuok nasud, pabalik-balik niadto ug karon pinaagi sa Pulong, aron nga walay ni usa ka mahibilin nga bato nga dili mahibuklad. Wala ko kahibalo kung kinsa ang Imong gikatagana nang daan ngadto sa kinabuhi, Ginoo. Dili ko buluhaton kini aron hibaloon kana, Imo kanang buluhaton. Apan buluhaton ko sa pagpalihok sa matag bato. Dios tabangi

ako, tabangi ang uban nga tawong nagatoo niini. Palihoka ang matag bato, Ginoo, nga walay bisan unsa man nga Imo nang gikatagana kondili ang magpatalinghug niini.

²¹² Gusto namong masaksihan ang Imong pag-abot, sa amo mismong henerasyon, Ginoo. Ginatoohan namo kini. Nagatoo kami nga—nga adunay usa pa ka Biyernes de Ramos; Biyernes Santo ug usa pa ka moabot nga Biyernes de Ramos. Ang usa ka paglansang ngadto sa Imong Iglesia, apan ang among kadaugan sa dihang moabot Ka na nga nagapangabayo.

²¹³ Nagaampo kami, Dios, nga Imong panalanginan, karon, ang Imong katawhan. Panalangini kini nga gamay'ng iglesia. Panalangini kining minahal nga pastor ug ang iyang anak nga lalaki dinhi, si Igsoong Outlaw ug—ug ang iyang anak; parehong si Jimmy Sr. ug Jr. Panalangini ang matag usa nga ania dinhi.

²¹⁴ Dios, hinaut nga wala lamang kami nanganhi niining buntaga. . . Hinaut nga ako. . . Nga ako wala lamang mibiyahe gikan pa sa Tucson aron lang nga. . . Kung nagkaaduna man ako og prebilihio sa pagwali ngadto sa mga tawo, Ginoo, kini—dili kini aron—aron himayaon ang unsa man gawas niining maong Persona, nga gikalibugan sa mga tawo kung kinsa kini. Nasayod sila nga dili makahimo niini ang tawo. Nasayod sila nga sobra pa kini sa tawo nga mahibalo niining mga butanga. Apan moingon pa ang mga tawo, “Unsa man kini?”

²¹⁵ Ginoo, nahibalo kaming Ikaw Kini. Si Jesus Cristo Kini, diha sa pagka-Balaang Espiritu. Siya mao ang Balaang Espiritu. “Gikan Ako sa Dios. Mobalik Ako ngadto sa Dios.” Ug makita namo ang maong dakung Haligi nga Kalayo sa among taliwala, Ginoo. Sama sa ilang pagkakita diha sa nahaunang bahin sa Biblia nga kauban si Moises. Nakita namo Kini diha sa tungatunga sa Biblia sa dihang padulong didto si Pablo sa Damascus. Makita namo Kini. Karon makita na namo Kini dinhi sa kaulahiag panahon pag-usab. Usa ka kapanghimatuoran ang tutulo. Dugay nang mao na kini ang Mensahe sa matag panahon.

²¹⁶ Dios, hinaut nga dili na mopabilin pa ang mga kalalaken-an ug mga kababayen-an sa mga tradisyon ug mga kredo. Apan hinaut nga manggula sila gikan nianang butanga, itugyan ang ilang mga kinabuhi ngadto sa Dios ug magtoo na; dili mosalig lang sa mga teorya ug mga butang nga iya sa tawo, kondili mosalig diha sa Buhi nga Dios. Samtang nga padayon pa kining mga panahon sa bakasyon, ang mga pagpangutana sa gihapon maoy: “Kinsa man kini? Unsa man kini? Bahin ba sa unsa ang tanan niini?” Mao sa gihapon ang mga pagpangutana sa mga tawong relihiyoso. Ug Kini ang mao rang Ginoong Jesus, nga nahimong unod diha sa Iyang katawhan, nga ginadihogan ang Iyang Pulong alang sa maong Pangasaw-onon. Ug dili nila Kini masabtan. Napadpad na sila kaayo diha sa Laodicea, hangtud

nga dili na sila kahibalo kung mahitungod ba sa unsa Kini. Apan nag-ingon ang propeta, “Magkaadunay Kahayag diha sa takna sa kahaponon.” Busa karon, nagapaabot kami Niini, Ginoo. Ari Ka, Ginoo, panalangini ang matag usa.

²¹⁷ Samtang nga nakaduko ang inyong mga ulo karon, ug ang inyong mga kasingkasing. Nagatoo ba kamo niini nga mao ang Kamatuoran? Nagatoo ba kamo? Ipataas lang ang inyong kamot, moingon, “Nagatoo gayud ako nga kana ang Kamatuoran, nga nanagpuyo na kita sa kaulahiing mga adlaw. Ania na kita dinhi karon ug nagatoo ako nga kita’y mga nagkabalit-ad na gayud og ayo. . .” Atua kamo sa maong panagtigum sa miaging adlaw, sa dihang ang trigo, ang lindog. . . Mahimatikdan ninyo, wala kita nagkaaduna og organisasyon aron mosunod niini. Ania na mismo ako dinhi sa una pa nga uban ang inyong pastor, sa pagsulod ug paghuman sa mga tuig. Sa kasagaran, duha o tulo ka tuig ug maorganisa na kini. Wala kini nag-organisa niining higayona. Dili niini mahimo. Mibulag na Niini ang tipaka, apan wala na’y sunod nga mahimong buhaton pa. Ang trigo, ang maong ministerio mibalik na mismo sa kung unsa kini kaniadto sa sinugdanan. Si Jesus Cristo Kini sa atong taliwala, higala. Dili usa ka tawo, kondili ang Tawong si Cristo Jesus nga nagapuyo diha kaninyo, ug nga gustong mamahimong kabahin ninyo, ug kamo nga mamahimong kabahin Niya. Mahimo ba nga inyo Siyang dawaton karon?

²¹⁸ Aduna ba dinhi nga wala pa nakadawat sa bautismo sa Espiritu, sa gihapon? Moingon ka karon, “Igsoong Branham, sultihan ta ka, usa ka higayon nakasinggit na ako.” Maayo kaayo kana. “Nagsulti na ako sa laing mga dila sa makausa.” Maayo kaayo kana, usab. Apan sa gihapon dili kana mao ang akong ginahisgotan. Giunsa mo man pagsinggit ug pagsulti sa laing mga dila ug nga ginasalikway ang Pulong? Ang kapanghimatuoran sa Balaang Espiritu mao ang pagtoo sa Iyang Pulong. Ingon na niini sa una pa sa matag kapanahonan kung madawat mo ang Pulong. Kadto nga mga sacerdote daug nila sa minilyon ka milya si Jesus paghisgotan na ang mga bunga sa Espiritu; maaghop, ug malinawon, ug malulot, mapainubsanon. Namungkag Siya og mga kasimbahanan, gipangsiya sila didto; ug gipapungot ang tawo didto, ug gipangtawag silang “mga bitin sa kasagbotan” ug tanan na. Kita n’yo? Apan Siya kadto ang Pulong. Siya kadto ang Pulong. Ingon niana kini: toohi ang Dios. Ang Dios mao ang Pulong. Toohi Kini.

²¹⁹ Kung wala pa gayud kamo sa gihapon nakadawat sa Cristohanong bautismo, adunay usa ka bautismohan dinhi. Wala pa gayud ninyo nadawat hangtud karon ang tinuod nga Balaang Espiritu, nga ginapahibalo kamo nga ang matag Pulong sa Dios maoy Kamatuoran; moingon ka, “amen” ngadto Niini ug toohan Kini sa tibuok mong kasingkasing, kung ingon-ana mahimo mong dawaton Kini niining buntaga. Ug dayon dili ka na

matangala pa kung Kinsa kining nagapalihok sa maong mga tawo sa paagi nga pagpanglihok nila. Maila mo na kung unsa Kini. Kung wala ka pa niana nga kasinatian, mahimo bang ingnon mo, “Igsoong Branham, hinumdumi ako diha sa imong pag-ampo, ug ipataas ko ang akong kamot”? Ug moingon ka, “Ug ako—akong. . .” Panalanginan ka sa Dios. Panalanginan ka sa Dios, ikaw, ikaw. Panalanginan ka sa Dios, maayo kana. Panalanginan ka sa Dios, maayo.

²²⁰ O Dios, samtang maanindot nga nagatugtog ang musika. . . Oh, Pagkahibulongan gayud Niya! Mao gyud. “Ang Magtatambag, Principe sa Pakigdait, Ang Dios nga Makagagahum, Ang Amahan nga walay katapusan.” Nagaampo ako nga magahatag Ka ngadto niining mga tawo, Ginoo. Mahimo lang ako moampo. Mao lang kana ang nahibaloan kong buhaton, mao ang pagpangamuyo alang kanila. Gipataas nila ang ilang mga kamot. Ginabuhat ko ang ingon nga gisaad ko kanila, nagaampo ako nga Imong ihatag kanila kining mahinungdanon nga kasinatian; dili lang nga kung unsa nga matang sa emosyon, kondili usa gayud ka tinuod nga kasinatian; nga mahimamat ang Dios sama sa gibuhat ni Moises didto sa lugar sa maong Kahimayaang Shekinah; ug dili lang dinha, kondili ang dili gayud pagsimang niana nga Pulong, ang dire-diretso nang paglakaw paingon sa maong Yutang Saad inubanan Niini. Dios, itugot kini ngadto sa usa’g usa, niining buntaga.

²²¹ Adunay mga balatian sa among taliwala karon, Dios. Nagaampo kami nga Imong pang-ayohon kana. Ayoha ang matag masakiton nga tawo, ang matag panginahanglanon. Itugot kini, Ginoo. Imoha na sila karon. Ako silang ginatugyan Kanimo sa Ngalan ni Jesus. Amen.

²²² Pasayloa ninyo ako, diretsong duha ka oras na ako dinhi sa itaas. Apan tan-awa, kaninyo ang tibuok gabii. Mahimo kamong mopauli ug mopabaskog ug matulog diyutay. Apan ayaw kalimti kung unsay gisulti ko kaninyo. Nakigsulti ako kaninyo nga gikan sa akong kasingkasing. Kahibalo ko nga medyo talagsaon kini. Pipila ka tuig na ang milabay mianhi ako dinhi sa Phoenix kauban kamo nga mga tawo, sa pagpang-ayo sa mga masakiton pinaagi sa pag-ampo sa pagtoo. Wala ko gayud kini gisaysay, dili ko gustong ipasabot kini. Nagbantay lang ako ug gitana-aw kung unsay buhaton sa mga tawo, gitana-aw lang ang mga pagpanundog ug ingon nianang mga butang nga nanungha. Usa kini ka dakung butang alang kanako ang makita ang mga niini.

²²³ Apan karon, nagaanhi ako kaninyo nga dala ang Mensaheng gipanghimatud-an sa nianang ilhanan. Unsa’y gibuhat sa iglesia. . . Wala, wala gayud kini nagdenominasyon. Apan unsa ma’y nahitabo ngadto sa mga denominasyon bahin niining rebaybal sa pikas? Unsa ma’y ilang gipangbuhat? Diretso silang napaingon sa Laodicea. Minilyon ug minilyon, ug binilyon sa mga dolyares ang gipangbubo ngadto niini, ug gayu’y. . . ug

nahimo siyang daku na ug bahandianon ug nangtukod na siya og minilyon ka dolyares nga bili sa mga kabtangan ug mga butang nga sama niana. Ug ang dawaton ang Mensahe? Dili gayud. Ila Kining ginasalikway. Unsa kini? Ang tipaka nga nagabulag na sa trigo. Karon mamaingon niana kinahanglan ang trigo, aron mahibulad diha sa Presensiya sa Anak aron nga mahimong usa na ka bug-os nga Maayong Balita, bulawanong lugas alang sa Ginoo. Mahimo bang toohan n'yo Kini? Kinsa man Kini, gayud? Kinsa ba Kini? Mahimo ba nga tawo Kini? Mahimo ba Kining usa ka iglesia? Mahimo ba Kining usa ka denominasyon? Si Jesus Cristo Kini, ang mao sa gihapon kagahapon, karon, ug hangtud sa kahangturan. Ginatoohan n'yo ba Siya?

²²⁴ Ginahunahuna ko karon, sa usa ka gamay lang nga pagsimba human sa usa ka mahait nga Mensaheng sama niana . . . Igsoon, unsa kaha kung hatagan mo kami og usa—usa—usa ka tono, uban sa mga batan-ong mag-aawit dinhi, bahin sa *I Love Him*. Nahibalo ba mo sa maong dugay na nga kanta?

I love Him, I love Him
Because He first loved me,
Purchased my salvation
On cold, dark Calvary.

²²⁵ Mahimo bang ubanan ninyo akong kantahon kini? Tanan kamo karon, diha sa usa lang ka pagsimba. Pag-pagsimba lang uban kanako.

I love Him, . . .

Karon, hinumdumi, nga sama sa telebisyon, anaa Siya sa sulod sa inyong lawak.

Because He first loved me
And purchased my salvation
On Calvary.

Naamgo n'yo ba kung unsay ipasabot niana? Maamgo n'yo ba? Masabtan n'yo ba ang kinahiladman niini, kung unsa ang Iyang gibuhat?

I love Him, . . .

Dili ko Siya makita, apan ania Siya dinhi. Aduna ko'y usa ka instrumento nga makasalo sa sulod dinhi, usa ka gamay'ng butang nga nagasiga sulod sa akong kasingkasing. Kahibalo kong ginaaninag niini Siya. Ania Siya dinhi.

. . . loved me
And purchased my salvation
On Calvary.

²²⁶ Karon, gusto kong buhaton ninyo kini, samtang nga atong ginalaylay kini. Karon sagolsagol na kita paghisgotan na kung mga unsa kita kaniadto. Hinumdumi, Katoliko ako sa una. Kita n'yo? Karon sagolsagol na kita nga grupo dinhi, apan nanggula na kitang tanan karon sa nianang butanga. Iyaha na

kita ni Cristo. Iyaha kita. Karon samtang nga atong kantahon kini, manglingi lang kita ug manglamano lang og mga kamot. Dili na kinahanglan manindog pa. Ingna lang, “Panalanginan ka sa Dios, igsoong lalaki. Panalanginan ka sa Dios, igsoong babaye,” samtang nga kantahon nato kini, diha sa usa gayud ka Cristohanong pagminahalay. Nagatoo kong gusto sa Dios nga simbahan Siya. Dili ba nga mao man usab ang ginahunahuna n’yo? Simbaha Siya. Siya . . . Ang Dios usa ka butang nga silimbahan. Ug gusto nato Siyang simbahan. Ug unsaon man nato pagbuhat . . . ? Higugmaon ninyo ang usa’g usa. Gusto ninyong tagdon ang usa’g usa . . . “Sa diha nga ginabuhath ninyo kini, ginabuhath usab ninyo nganhi Kanako.”

²²⁷ Ato kining kantahon karon, ug—ug maglamanohay sa usa’g usa, ug nagasimba uban ang . . .

. . . ’cause He . . .

Panalanginan kamo sa Dios.

Oh, I love Him, I love Him
Because He first loved me
And purchased my salvation
On . . .

²²⁸ Ginahunahuna ko, kung nagadilaab ba kaha kana sa inyong kasingkasing? Aduna ba’y butang sa sulod dinha nga—nga pagkamaanindot gayud bation? Kahibalo mo, mabati mo nga daw sa gusto mong igawas Kini dinhi ug gakuson Kini. Huh? Ingon niana ba ang ginabati mo sa imong kasingkasing? Kung dili man, higala, magbantay ka. Anaa ka sa makuyaw nga kahintang, kita n’yo, kung wala’y usa ka tinuod nga gugma dinha, sa kung unsang butang nga “I love Him.” Dili lang nga usa ka kalantahon, kondili usa gayud ka realidad. Iya akong unang gihigugma. Asa na kaha ako napaingon, karon . . . Singkwenta’y-singko anyos na ako. Hapit na matapos ang akong kinabuhi. Kita n’yo? Ug ang akong . . . Gipalit na ang akong kaluwasan . . . Igsoong Trow, unsa unta ang imong . . . ? [Usa ka lalaki ang nagasulti gikan sa kongregasyon—Ed.]

²²⁹ Nadungog na ninyo kana nga testimonyo, “Giluwas na.”

Giluwas na pinaagi sa Iyang Diosnong gahum,
Giluwas na ngadto sa bag-o nga halangdong
kahitas-an!
Kinabuhi karo’y maanindot na ang akong
kalipay bug-os na,
Tungod kay ako luwas na!

²³⁰ Unsaon mo man pagkahibalo? Ang Akong Espiritu nagapamatuod sa Iyang Pulong nga ako’y nakalabang na gikan sa kamatayon ngadto sa Kinabuhi.

²³¹ Salamat kaninyo, minahal nga mga Cristohanon. Kaayohan ang gihatag niana kanako. Gusto kong mosulod sa usa ka lugar

nga sama niini kon diin mabati mong anaa ka lang sa imong panimalay. Malisud kanako ang molakaw na. Padayon akong nagahunahuna, nagatan-aw nianang orasan; ug—ug nga makita ang anak kong babaye nga naglingkod dinha, nagalingolingo sa iyang ulo nganhi kanako, ug nagaduko nga sama niana; ug—ug ang anak kong lalaki, nga naglingkod dinhi, nagaingon, “Unsay—unsa ba ang nakapabilin pa kanimo dinhi?” Wala ko kahibalo. Gusto ko lang magpabilin pa . . . kahibalo na mo. Wala ko kahibalo. Gusto ko lang ang pagpakigkauban. Kahibalo mo, dili ko makuha kini sa daghang mga lugar (kahibalo na mo niana), nagkaanam na ka gamay sa kanunay. Apan kahibalo ko nga papaduol na ako dinha. Kita n’yo? Ug moabot ang adlaw nga magawali ako sa ulahi ko na nga sermon, igasarado ko na ang akong Biblia sa kaulahiing higayon. Mobiyahe na ako diha sa usa ka gamay’ng pagbiyahe kung ingon-ana. Adtoi og bisitahi ninyo ako nianang higayona pag-nahimo ko na. Adtoi ako, ug manglingkod kita didto sa walay katapusan, ug mag-estoryahanay sama sa giingon ni Igsoong Carl, ug mabuhi na sa walay katapusan.

²³² Karon tan-awa, mga higala, hangyoon ko kamo sa usa ka butang nga gusto kong ipabuhat kaninyo. Karon napalangan ko na hinoon kamo sa inyong paniudto. Kita n’yo? Ug karon, adunay gibuhat si Igsoong Outlaw dili pa lang dugay . . . Talagsa ra gayud siya mobuhat og unsa man nga dili ko magustohan. Apan—nagpakuha siya og usa ka offering alang kanako, kita n’yo. Unsa kaha kung ang usa kanila moadto sa likod, ug ipauli balik kana nga offering dinha, ug nga motindog dinha sa pultahan. Ug pangkuhaa ninyo kini balik ug ipalit kini sa inyong paniudto. Usa kana ka regalo gikan kanako, balik sa inyo. Kita n’yo? Buhata ninyo kana. Kita n’yo? Okay lang kana. Buutan siya nga tawo. Siya sa una pa . . . Wala gayud siya . . . Wala gayud ko’y giadtoan kon asa man o unsa man gawas nga iyang—gusto niyang buhaton ang usa ka butang aron makatabang kanako. Ingon niana siya.

²³³ Adunay usa ka lalaki nga ania dinhi; ako—medyo ayaw kong isulti ang ilang ngalan, basin masakitan ang ilang mga pagbati. Adunay usa ka bililhong igsoong lalaki nga mipanaw na ngadto sa Kahimayaan, mipanaw sa hinanali lang. Ang iyang tinguha nga . . . Nahibalo siya nga mahilig ako sa kakahuyan, busa gusto niya akong palitan og usa ka jeep. Dili ko gusto siyang tugotan nga buhaton kini. Dayon human nga mipanaw na siya, gusto sa iyang asawa nga buhaton kini, ug dili ko gustong tugotan ang iyang asawa nga buhaton kini. Apan nagkasabot ang uban nga mga batan-ong kalalaken-an ug mianhi dinhi. . . Ug—ug adunay usa pa ka igsoong lalaki ang mianhi niining iglesia, nga miingon, “Igsoong Branham, nagapangbuhat ako og mga sand wagon.” Kahibalo na mo, mga buggy; o kanang tawag n’yo nga *hacks*. Ug miingon, “Buhatan ta ka og usa niini.” Wala ko siya gitugotan.

Kahibalo ba mo kung unsay gihimo niining mga bataa? Naghimo sila og usa—usa ka parehong jeep ug sand hack nga usa ra. Wala pa gyud ko'y nakita og nga ingon niini.

²³⁴ Gikan sa maong tigum sa Tucson niadtong gabii, gi-drayb nila kini paadto sa akong nataran, ug miingon, “Regalo kini gikan sa mga tawo sa—sa Phoenix.” Kita n'yo, wala pa gani giapil ang ilang mga kaugalingon, miingon lang, “Oh, sa amo kini tanan, kita n'yo.” Kana'y. . . Oh, ako—nahibaloan ko dihadiha nga kung makaadto na gayud ako sa Langit, magapuyo ako uban sa mga tawong sama niana. Pagkamahinungdanon kana kanako, kahibalo na mo, usa gayud ka butang nga sama niana; niining mga gamay'ng. . . butang.

²³⁵ Kana ang nagapabati kanako og ingon niana kang Igsoong Outlaw dinhi. Nagaingon, “Bueno, Igsoong Branham, ako gayud. . .” Ang moanhi dinhi diha sa usa ka. . . makaanha sa usa ka lugar handug nga napahigugma ka na, ug mag-estorya kanimo, ug makig-estorya mahitungod kang Jesus. Ug—ug ang mga tawo sa. . . Bueno, kahibalo na mo, “Ang mga langgam nga magkabalhibo.” Kahibalo na mo, daw sa gusto nila ang magtipontipon ug manghisgot og mga butang, magpakigkauban sa usa'g usa.

²³⁶ Ug ako—ginapasalamatan ko gayud kana, apan ako—dili ko gusto mokuha og offering, igsoong lalaki, igsoong babaye. Ako. . . ginasuweldohan ako sa akong iglesia og usa ka gamay nga suweldo nga usa ka gatus ka dolyar kada semana ug okay na ako niana. Busa ako—ginapasalamatan ko kini. Karon kung aduna man kaninyo ang gusto na magpaniudto, bueno, adunay tawong moanha dinha sa pultahan ug kuhaa kanako ang inyong paniudto. Nakita n'yo, okay ra gayud kini. Ang uban kaninyo, napalangan ko na kamo sa inyong pagpaniudto. Gihigugma ba ninyo Siya? Kung ingon-ana higugmaon gayud ninyo ako kay ako kabahin Niya. Kita n'yo? Amen. Mao kana ang hinungdan nga gihigugma ko kamo. Panalanginan kamo sa Ginoo.

²³⁷ Manindog kita karon. Ayaw kalimti ang nagasingabot namó nga mga panagtigum. Unsa mang higayon nga ania kami, timan-i lang, pagpanganhi gayud. Kanunay gayud kamong ginaabiabi. Mahimo bang iampo ninyo ako? Ako—ako ang tawong nanginahanglan og pag-ampo. Mahimo ba ninyong iampo? Pila kaha ang nakapamalandung sa maong kabug-aton, unsay kinahanglan kong buhaton, ug ang mga butang nga nagahulat kanako? Ug kahibalo ako kung unsa ang palaaboton, ang sa unahan mismo. Nakita n'yo? Makita ko kini sa ingon ka pareho ra ingon nga makita ko ang uban pang mga butang nga umaabot. Kahibalo ko kung unsa ang umaabot. Kita n'yo? Apan wala na'y panahon aron maghisgot mahitungod niana. Hisgotan nato kung unsa na'y nagakahitabo mismo karon. Bahala na ang ugma sa kaugalingon niini. Kita n'yo? Kamo ba'y. . . mahimo

bang iampo ninyo ako? Karon, nagpataas na ba mo sa inyong mga kamot nga mag-ampo kamo alang kanako? Sige.

²³⁸ Panalanginan kamo karon sa Dios. Gusto kong ihatag na ang panerbisyo balik ngadto sa inyong hiligugmaon nga pastor, si Igsoong Jimmy Outlaw. Panalanginan ka sa Dios, Igsoong Jim.



UNSA BA'Y INGON NINYO KUNG KINSA KINI? CEB64-1227

(Who Do You Say This Is?)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Disyembre 27, 1964, didto sa Jesus Name Church sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2014 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org